

下



芻詢錄

存徵下

碧幢山隱劉思敬輯



鄭侍御濂字師周嘉靖癸未進士爲行人兩使藩封
不以餽饁充橐選授山東道御史按兩浙粵西有能
名出爲湖廣按察使以父憂乞致仕歸養母盡孝設
榻于母側旦夕候問起居惟謹母稍不懌卽長跪進
甘旨迨母卒公已耄矣哀毀逾禮聞者著純孝傳以
貽之待二弟無間言絕跡公門年八十餘卒送友詩

江空秋鴈影。砌冷夜蛩聲。疏請省親寒鴈投陽書。未寄秋風報冷客先知。

劉督府璽龍驤衛指揮同知少業儒有文名居官廉潔羣公推轂致位兩府始分閩江西計米而食妻子布衣不完巡按穆御史相特疏薦之有僚友比之學官家人謂之窮鬼等語推總督漕運上識其名喜曰是前窮鬼耶亟可其奏公夙諳利弊興革悉當侯勛方有寵囑市南物付運舟分載入都以網利公不應

以疾請告久之總漕非人復召公竟以不屈忤當道罷歸斷葢采菑俗呼青菜劉

管檢校景字子山幼穎異屢舉不第貢入太學庚子授廣信府檢校監司聞其才檄署永豐又署上饒適橫峰窰民作亂監司曰此非管檢校不可公往宣布威德作勸善懲惡箴以示之盜悔過多散去反殺賊魁以獻餘悉不問民乃安于是爭塑其像以祀于家遷布政司檢校先是武宗駐蹕南京取縣志縣故無

志縣尹白思齊求公撰未浹旬志成上之後大京兆
葉公以府無志亦屬公爲之志成藏于府萬曆間汪
京兆宗伊重修之同公修志者徐霖劉雨也雨字潤
之文最高古名更重于諸公志中雨筆削居多傳子
山佳句云峰斷青蘿合江空白練長所著有西浦稿
金孝廉大車字子有幼負奇名諫公卿間沈默矜重
退然如不勝衣嘉靖乙酉舉于鄉生平重義輕利父
遺產千金悉予諸弟居家從不知握算人有負所貸
者召讓之已而聞其赤貧更以金遺之博綜藝文周
秦以下無不研究屬文非古弗程山亭詩石泉當戶
瀉山鳥入雲呼雨花臺觀月燈懸村落昏初見帆出
江烟遠欲迷弘濟寺飛閣俯臨秋水濶懸厓平對暮
潮生龍蟠古洞噓雲氣風撼長波雜雨聲盧龍山百
尺重巖草木齊古藤垂引躡雲梯塞鴈橫空迷北固
淮流帶雨入清溪弟子坤名大輿高才困諸生脫粟
不厭南都貴人多訪之避去不荅少所與遊者江上

詩鳥衝黃葉。下潮帶白蘋。歸天界寺。午香飄石鼎中。
飯出胡麻。古樹秋生耳。疎枝晚綴花。秋日遊靈谷。西
風涼意早。古殿起秋雲。鴈塔丹崖迥。龍池碧樹分。陰
廊餘畫壁。斷碣有苔文。盡日無人跡。呦呦見鹿羣。千
佛嶺。疊磴松雲合。斜風花雨來。高低成色相。窈窕入
莓苔。大車有子有集。大輿有子坤集。

高汝州遠。字近思。嘉靖戊子鄉薦。泊舟對月詩。風清
沙岸淨。月滿浪花圓。弘濟寺。江豚吹浪出。還沒野鷺
得魚棲。復驚。

余侍御光。號古峯。嘉靖壬辰進士。歷官浙江道監察
御史。爲人倜儻。敢言代。巡廣東。擊豪強。理冤獄。民甚
德之。以忤嚴嵩。致政歸。曾獻兩京賦。奉旨入史館。賞
新鈔一千貫。有古峯集。行世子孟麟。萬曆甲戌榜眼。
大城山樵。盛時泰。亦爲二京賦。藏笥中。長史黃琮。字
元質。亦著有金陵賦。

沈御史越。字中甫。江寧縣人。氣韻高簡。舉嘉靖壬辰

進士令羅田吏事精敏令民墾山谷污萊地千餘畝收流移附籍者一百九十七戶移平江縣羅田之民思之祀于名宦平江彫瘵號難治公視事精察善斷裁里甲費十之六七時有所鞠聽操筆剖判如流擢山東道監察御史平江之民思之祀于名宦爲御史按江西執法峻整以風力著稱時累朝多以恩倖得官武員冗濫京衛旗役冒替賄占不可勝數有旨命公查覈之落職罷役者數千人疏四上必得請乃已

公以上方任用一意持法不以私假人分宜當國意有所不悅以指授公不從分宜銜之會甲辰試事發公坐監試左遷出判開州遷衛輝府推官德安府同知以不能隨時俛仰竟拂袖歸年甫五十閉戶著書不與貴人接鄉邑罕睹其面布衣蔬水晏如也年七十卒所纂春秋分國便覽春秋經傳集解宋史詳節諸史撮抄三黨編藩鎮傳及所著詩文韓峯隨筆麓村詩草西巡紀行詔獄始末澶淵雜著新亭漫稿聞

見錄藏于家。或云韓峯亦工小令。有詞譜續集附錄。遯園先生曰。前輩士大夫致政者。類杜門謝交。郡邑大夫。至終任多不識面。在金陵尤尚志節。耻邀結焉。如沈韓峯歸里。坐樓上。錄所喜書。以三錢雞毛筆。日抄至數十百冊。親友亦不數相見。汪公宗伊爲南部郎。公按部時所薦官也。執門生禮。候公辭不見。立赤日中數刻。僅一接之。汪公歎息而去。其簡遠如此。又言外舅少冶王公罷郡歸。閉戶讀書。門無雜賓。士

大夫有過訪者。纔一報謁而已。高自位置。不輕可一世。以是得簡貴聲。蓋公及見弘正間前輩風檢。其深居簡出。自重而不輕與人。猶是舊時矩度。嗟乎典型既遠。勢利深人。日薰習于流俗。則惟知結納爲居奇。與援爲捷徑。不信有守身俟命之學。名雖薦紳而實皆倚門獻笑之所爲。豈不羞先民而辱當世之士哉。謝布政少南。字應午。號與槐。嘉靖壬辰進士。贈友詩。月出烟中樹。星窺水面舟。子陵釣臺。故人不預興亡。

事太史空勞處士猜。少室招宴尊前寶炬留。明月簾外金花綴綵雲。公督學廣西喜臨桂縣童生張鳴鳳文筆奇古。因進而訓之曰。吾子不患不成名。患胸中無全書耳。乃取兩漢書親爲之句讀。令五日進院一背。雖出巡亦携之行。公轉官時。兩漢書已完矣。其造就人才如此。鳴鳳字羽王。後來江寧拜于墓下立碑而去。所著有河垣稿。謫台稿。粵臺稿。

陳奉新芹字子野。號橫厓。羽林前衛籍。十歲能詩。弱

冠領嘉靖甲午鄉薦。屢上春官不第。乃往來攝山天台之間。爲方外遊。壬戌選崇仁教諭。尹奉新調寧鄉。非其好也。三上書求歸。絕意世事。起邀笛閣五柳亭于秦淮水上。臨流觴咏。居家十五年。未嘗履公庭。談時政。疎散自得。與仲交諸人結青溪社。才思敏贍。嘗寫竹枝。醉墨欹斜。觀者叫絕。文徵仲戒其門下士往南京。慎勿畫竹。彼中有人也。子野曾夢入深山中。石梁跨道。瀑布洒空洞中。二老僧趺坐。周繞木欄。後遊

天台宛如夢中木欄猶在問之士人云老僧化去久
矣自是省悟專精內典送友詩花倚新枝笑人隨舊
燕歸長干晚岫沉孤翠秋英吐艷紅靈谷徑穿幽樹
香門積古苔深丹殿揚朝彩雕欄下夕陰桃葉渡獻
之當年寵桃葉桃葉渡江自迎接雲容難比美人衣
花艷爭如美人頰王令風流舊有聲千年古渡襲佳
名渡頭春水年年綠桃葉桃花傷客情寄僧水村寒
氣早山館月明孤焦山烟橫沙市遠船過海門稀集
姚園弈散青林寒月墮歌翻白雪凍雲高著有子野
集鳳泉堂稿忠孝說義姚太守敘卿嘗評其詩清婉
幽澹有陶韋王孟風度書小楷則鍾太傅入室弟子
畫則長于寫生而于竹特妙在本朝當是王孟端後
一人人以為確論
許少卿毅字仲詒號石城上元人生時大父怡心占
之有貴徵語人曰吾家累世樹善百年當有聞其在
孺子乎二十舉嘉靖乙酉鄉試三上春官不利乙未

公車渡江夜夢巨神自天而下授以龍墨一笏有大
魁二字入京宿旅舍就寢彷彿見有持二軸索畫者
公援筆成蒼龍形牙爪猙獰雲氣騰湧後復夢人授
以牙刻圖書有不負所學四字果中會試第一人時
毘陵薛方山負盛名不欲居第二榜前見石城文戲
曰會元裝在奚囊裏又被南京剪綵多蓋公文春容
恬適有以奪其氣也久之方山意終不平又戲曰會
元如軟圓領須硬襯襪支撐公笑曰若非軟圓領在
上雖有硬襯襪如何見得人聞者闕堂是年肅皇御
文華殿親試進士入中秘讀卷者以公對策論時務
甚剴切恐不合上意故抑之禮部夏尚書言獨不平
曰許某獨奈何不令入館他日知公能詩益惜之授
戶部主事管倉務以清慎舉其職梁尚書大用甚器
之居三月調禮部蓋夏公引重云丙申七月奔父喪
三年哀毀不出戶呂侍郎柎稱之曰古稱三年憂殆
近之矣服闋補吏部轉司封郎清理吏胥條革次序

秩然轉文選時行取官候選日久舊例後任者至多
反前所舉者而低昂之公曰此不肖之心也亟白太
宰考選冢宰欲俟覲後行公曰覲官叢至萬一有蜚
語則行取者難爲去留冢宰聽其言竟以二月畢考
選事僉謂其公而厚云任滿當陞因乞南行就養遂
拜南太常寺少卿改江西提學造士甚著聲譽陞南
尚寶司卿致仕家居三十餘年四方游宦至留都者
無不慕敬每投轄款之然竟不報謁或疑其簡公曰

林下當如是也平生坦蕩和煦不設城府人比之劉
寬卓茂焉春秋良日引二三知己巖居川觀歌咏相
樂有時奉太安人徜徉臺榭間子婦曾孫次第爲壽
每歲初度日九卿諸公多同年故友冠蓋濟濟遞進
稱觴而太安人命服朱紫煌煌如也鄉之人瞻望咨
嗟不榮先生貴而榮其親太安人八十有七考終公
年亦踰耆以白首盡哀遠近嘆服公以乙酉賢書至
萬曆乙酉舉人謁先生尚矍鑠碧眼長顙白鬚飄然

見者謂神仙中人。年八十三卒。余學士幼峯爲之傳。曰：先生遐舉駿發。潤色鴻業。當蒸蒸大位。而于仕常齟齬不竟所施。或造物者未可盡信乎。及觀先生當累朝熙洽之際。春秋高。福祉駢優。游林泉。享其全盛。則尺幅之孰短孰長。豈待辨耶。里人又謂先生性。和悅。每高會盡歡。亦忘先生之官列卿者。然涇渭了了。不喜苟合。凡游博鑽營之技。卒不敢至其門。尤尚儉樸。不欲以玩好相奢。少而服官。未艾歸里。著書自娛。不肯以才名自負。不治防畛。以取進于時。然逋誚逋遷。始終維持一節。而公門無私言。又其斬斬不可犯者。此皆先生實錄也。病革。不屬後事。但撰所行事。琅琅可誦。遂整衣冠而逝。古稱安義。命至死不變。如先生幾何人哉。著有省中武林外臺二臺歸田諸稿。行世。次韻詩。筵前香篆。將花氣。院外松風。雜鳥聲。方山絕頂。深崖藉草。秋仍茂。絕頂清池。旱不消。散睇青巒。圍錦甸。舉頭蒼靄。接丹霄。弘濟寺近廓。看江色。臨崖

坐佛宮。舟航諸道接。鐘鼓四天通。

石城先生之父陞。字彥明。善顧東橋。陳石亭王南原。好法書名畫。登臨嘯咏。意興閒適。晚泊云。西風疎鴈陣。斜日變山容。園亭云。花散餘香來客座。竹分新翠過鄰家。石亭贊其像曰。軒曰嘉會。人無泛求。居曰惟適。身無過求。堂曰貽穀。後無餘求。以觀許子之面目。則可以類求矣。人稱攝泉先生。著有嘉會齋稿。石城子恒吉。上林苑監錄事。元吉。南京光祿寺署正。孫天叙。己卯舉人。

陳僉事鳳。字元舉。太醫院籍。幼聰穎。不羣。過目成誦。爲古詩文。動凌作者。舉嘉靖乙酉亞魁。乙未進士。授南陽推官。郡有疑獄數案。久不決。公至原情核實。人稱神明。丁父艱。起復。補彰德。擢刑部主事。決囚多所平反。署中故有白雲樓。暇日與文學僚友眺咏其上。稱爲西臺雅集。歷郎中。出僉江西。母憂。再補四川。改陝西。是時已病。聞邊警。冒暑抵慶陽。扶病經畫。以勞

苦卒公博學藻思卓有矩度著欣慕編清華堂稿摘
存行世題雨花臺句落葉山中寺秋風江上臺溪山
春雨圖貪看秀色卷簾坐不覺嵐氣侵衣巾石塘波
閒先受月池迥不驚鷗臘日沙白常含凍雲昏易作
陰相傳玉泉欣慕編盛仲交刻之蒼潤軒寄謝與
槐大叅與槐荅以書云如王辣齋之風節梅損齋之
博雅李飲虹之能諫金赤松之文翰編中豈可少

敬覽訢慕編載梁宮保至顧副使僅三十有六人
卽與槐先生所舉亦偶記者耳然玉泉竟不增入
先民好尚不可強若是茲集凡遺編故老所傳悉
載不欲以已意芟之恐後此摭採益艱也猶苦見
聞未廣不能無憾云

寶幢居士顧源字清甫豪雋不羣詩書畫具有古法
皆不泥古法嘗謂焦澹園曰書須古法四分已意六
分乃妙不然縱筆筆似古終成奴書也家有日涉園
陳魯南爲之詩曰六朝家世舊風流猶說江南顧虎

頭花竹徑深如樂苑。牕楹池繞似滄洲。東晉香爐金
籀字。南唐畫障澄心紙。米家圖卷鄴侯書。平泉樹石
烏皮几。想見勝槩矣。中年究心禪理。大有悟入。與名
僧結西方社。戒律精嚴。獨坐小樓。唯一童子奉香花。
淨水家人。女子絕不見面。親知杜絕。往來臨終。與雲
谷素菴等相對念佛。數晝夜。內人報云。滿宅聞蓮花
香。諸子皆庠生。素不信佛。至是乃泣求所囑。寶幢笑
曰。汝謂我生耶。死耶。端然而化。殷南溟作寶幢居士
傳。馮開之曰。予欲採近世往生事跡顯著者。彙爲一
集。當以寶幢壓卷。焦澹園刻居士玉露堂稿。行世。本
業寺有清甫留題。石壁瞻龍象。香林踏虎踪。雲中開
殿閣。煙際織杉松。日月三天逼。乾坤一氣封。此心隨
物化。長嘯倚諸峯。靈應觀雞犬。空壇靜雲蘿。白晝長
弘濟寺。蘭若臨無地。山腰架佛堂。水花分藻井。巖翠
拂虹梁。海日照空濶。天風動渺茫。家藏宋元名筆甚
多。善雲山自成一家。有百年智巧。消磨盡慚愧人傳。

粉墨痕之句又一絕云策杖青林晚山與雨濤不野
雲仍有意相伴宿柴扉

李臨淮言恭字惟寅小桃源句山折路疑盡花深鳥
自藏伏城驛亂水斜穿徑空山曲抱村送友夢回芳
草遠人去落花多

廖工部文光字士龍上元人父經四川廣安州同知
有清譽文光嘉靖丁酉亞魁令清江政尚廉明時分
宜執政嘗擒其橫僕繫獄寘于法人多危之其直指

特薦轉廣信同知郡有商被盜幾死忽若神呼之曷
告于廖青天商隨投告竟獲盜抵罪民益信服去有
遺思晉戶部員外郎督揚稅餘羨六千金盡登庫陞
工部都水郎罷家居二十餘年嘯咏自樂年八十卒
著有萬曆統天賦佺宜集子希元隆慶辛未進士貴
州憲副

賦役誌載嘉靖末年坊甲苦役傾家殞命者相繼上
元庠生趙善繼者倜儻負氣重義直言日夜謀與同

里救父兄門庭之難奔走陳訴已而疾苦漸達于諸司會郭給諫具奏得請下所司悉爲蠲滌民獲更甦皆善繼匍匐拮据之力事詳誌暨盧璧李曉碑記中卒之日異姓來哭者數十百人從祀惠澤祠

盧少卿璧字國賢家世金吾右衛指揮公獨業儒舉嘉靖戊戌進士擢南戶部主事陞彰德知府改漢陽陞苑馬少卿天性孝友父病以身爲禱親喪衣不解帶者半載哀毀骨立居官常祿外秋毫無取及歸家計益窘杜門掃軌不通公府性峭直終身不媚一人僚佐亦不假辭色動遵禮法夫婦相敬如賓子孫必正衣冠然後敢見性好菊宅旁有園公手莪其中廣求異品躬搔灌之花發招好友宴賞累日自餘閉戶晏坐讀異書人罕識其面卒年七十有八所著有治漳備忘錄關中集兩山墨談客中閒話東籬品彙等

集

聚寶門外惠澤祠碑記予見公文曰二縣附郭諸司

轄焉。其賦役之繁。坊廂之困。固非一朝。邇年征派百出。逃亡日衆。存者凜凜然愁苦呻吟。殆不知有生人之樂矣。賴羣公濟美。心盡民瘼。是故導之而使言。傾耳而委曲爲之。處由乎我者。不移時而報罷。勢相牽掣者。移文以酌議。乃戶科麓池郭公親爲題請。悉獲俞旨。代巡栗庵宋公又虛心博訪。詳定條約。卽縣亭勒石。詳具惠政錄中。語其槩。則光祿柴薪。九庫夫役。歲免賠納。各不啻千金矣。各衙門之修理。與晏會及額外之應付。新增之工食。與諸雜辦。所省又不知其幾矣。坊長總坊當頭革而爲僱役。而取之者阻作奸者消矣。徵派有數。盈縮有權力。差有等。什物有紀。益之流移。當鋪三百。則兩利而俱存矣。府有號簿。縣有循環。部院有稽查。戶科有奏繳。其防檢可謂密矣。是故昔之費也五六。今之費也二三。昔之勞也八九。今之勞也一二。昔之愁苦呻吟者。今欣欣然喜色相告矣。民之感之。豈待旣去之後哉。祠之所以作也。所祀

撫院雙江方公代巡少岩黃公等十人趙生善繼爲之倡隆慶元年六月吉日

鶴山李曉續建惠澤祠記曰上江二縣始爲坊百餘既而盈耗靡常正統間上元併爲坊者四十有四江寧併爲坊者三十有五坊定爲十甲坊長一人甲首十人以供勾攝而已後以里甲告訐始度力徵銀以備邑公費甲每二載有半役輪一季先時戶蕃事簡官重名節民不告勞邇來徵需無厭瑣屑百種皆以邑民爲囊笥取諸中而用之嗷然不堪命矣令苦應酬擇每坊民之少裕者數戶以總徵銀之出納號曰買辦名雖曰總而實則欲其補浮費之不足也以十數戶之窮民供數十百大吏之冗費民安得不瘠且亡耶矧江南民無恒產多逐末以謀朝夕耶且邑人素孱畏威不健訟雖貧至縷裂痛至刺骨亦惟向隅飲泣焉耳棄鄉井離墟墓焉耳甚至苦迫脇無聊往往不欲其生焉耳嗟乎爲民父母何使之至此極耶

圖且見金陵民風淳樸堪憐

不減鄭俠

郡士趙子白石遭此蕩析殆盡。不忍視邑人之滅頂。率同志陳諸當路。每群邪不滿。雖遭誣讟。巖弗挫。時巡撫方公諫議郭公代巡黃公京兆呂公惻然。一爲經畫。甫少蘇。居無何。夙弊仍臻矣。則左右羣小從吏爲之蔽耳。趙子重悲傷之。更欲赴愬。適通府陶公攝江寧篆。聞之。愀然。爰謀諸僚友。告諸京兆。會代巡宋公按部。趙子盱衡言之。公深憫焉。爲起癘瘵。更役制。勒貞砥。垂可久。陶公乃究民隱。剔奸蠹。遏弊源。痛爲裁革。公創爲定畫。一曰審實編櫃銀。以去無徵者。而公家得其實用。二曰定額設外櫃銀貯庫。以備公費。而免坊民之浪賠。三曰僱募應辦人役。以便集事。而吏胥公同支取。四曰輪人夫以應其役。使而窶乏者敘次撥差。至于應用什物之類。貯于郡府屬之吏。以候迎送。一不煩諸民。于凡費之公者。節之。冗者裁之。自此法立。省民費者大半。而昔之鼠穴狐窟。悉皆屏息。若坊民之買辦借辦。舉皆罷去。是何也。朱子曰。伐木

剪枝不若斧其根。壅水捍波不若塞其源。此固二公
欲去坊民之微意也。時有僉壬欲蠹之者。公亦弗恤。
百年積弊不崇朝而獲清。邑人如出膏火。登爽愷予
里居老矣。良爲民仰屋竊嘆者久。忽荷賢明惠政之
新。幸吾民永綏之福。咸趙子憂民之憂。謹勒諸石。宋
公諱懔進士。商丘人。陶公諱守訓舉人。平樂人。而按
鶴山字子晦。穎雋有識。困于場屋。乃游成均。授嵯縣
丞。進瀋陽衛經歷。乃老。事親孝。母病躬侍湯藥不懈。
生平仗義好拯人之急。師蔣旅卒。家貧。公經紀逆其
喪歸葬之。太學同舍姚生遺其袖中金。公拾而候其
人歸之。其素行甚著。里中稱爲鶴山先生。江上望金
山詩。濤聲風外壯。雲影日邊輕。著有賓柳堂稿。
邢侍講一鳳。字羽伯。龍江衛人。嘉靖丁酉鄉薦。以林
爲姓。登科後復姓邢。辛丑殿試一甲第三人。屢官侍
講。遷太常寺少卿。公修幹濶步。有才情。工小篆。求者
屢滿。葺屋闢園。一觴一咏。人羨江左風流學士云。少

讀書朝天宮。既貴猶與道士執布衣。交死為治喪。里中稱為長者。有集行世。公家居留意民瘼。予幼赴童子試。觀上元縣碑。有公文曰。上元首附京師。累朝為根本。重薄賦輕徭。神完氣固。蓋未有以病也。嘉靖中。襁惟正之供。小破原額。而歲時科派。率至無常。吏胥緣此以侵漁。坐食因之。而日夥。神奸鬼秘。莫可究詰。或者又從而信是使焉。故始以無籍而來者。今皆衣紈袴。啜梁肉。棲大厦。挈妖姬。廣置膏腴。而飛詭稅糧。俾吾終歲勤動之民。竭精力以應公家之求者。什一。剝膚鎚髓。以待彼不時之需者。什九。日戚戚焉。若三尸之伏。肝癥痕之糾。肺憔悴呻吟。罔不思所以療也。而何生之。是樂皇皇得一人焉。諳其受病之源。予以對症之藥。不徇庸俗。滌藏濯腑。而新之。如隴西袁侯者。蓋醫之罕覩也。當其時。生意殆津津矣。而以他故去。未竟厥施。隆慶壬申秋。大京兆晴江杜公來。首詢民瘼。別駕西津趙君署乃事。而奉行惟懇。諭耆民

陶詩等訪時弊之蠹政害民者二十件與作弊欺負之徒罪惡貫盈者十四人併上之既又陳之巡撫峽張公巡方明臺向公咸是其言明臺謂必見忌于小人而慮中沮也令悉治罪勒石以利無窮事下節推少峯周君暨趙君議允合而依憑城社者陰圖反中乘墉叫呼勘覆雖極詳明而施行則總仍舊貫更生之良幾爲斷腸之醜民心又洶洶矣賴大京兆遡川楊公持以獨斷而力救之責成東瀛林侯侯則按其成牘而周爰咨諏協于克一斷而行之以圖厥終至于今苛毒以融元氣以滋盎然得以永天命焉竊謂民之始是役也與其幾行而敗敗而興興而復成也其病症之輾轉與夫藥力之暝眩始終三年厥惟艱哉繼而大京兆少泉汪公至銳精求治剔蠹蘇疲充厯公意也乃與遡川公思其艱樂其成恐其久而或替特檄刻是石首檄丁糧以窮其源次清飛詭以息其波明實科以定其止據實徵以要其歸其諸馬

政羣糧長里批頭總書外差皆害切腹心者悉罷之。民間恒業存可無廢。廢可期復益莫大焉。餘件詳冊附刻。徧布使吏書不得增損侵漁。以病吾赤子。則來者觀是刻可以稽醫案矣。

殷秋溟先生邁。字時訓。世籍江寧縣人。少穎異。端靖。七歲母沒。育于外祖母翁氏。始受書。輒有志聖賢之學。十七就試。遂冠諸生。二十登鄉薦。公以少失恃。居恒茹哀。倍加刻勵。乃時時寢疾。三上公車不利。肄業

南雍。與江西何善山游。聞陽明先生學。又從少司成南野歐陽公論道。有當于心。以爲非靜無以成學。遂屏居山寺。鍵關默養。參究佛乘。多所自得。嘉靖辛丑。舉進士。授戶部主事。以病乞南。改驗封司。丙午考績。冢宰西盤張公稱其踐履端雅。經畫精詳。尋進文選司郎中。丁外艱。服滿復除前官。雖委蛇清要。而不耐交際苛禮。每勞必病。每病輒欲乞休。癸丑上六年績。書進江西左叅議。甲寅以疾辭未允。乙卯提調鄉試。

中丞午山程公代巡初泉吳公交薦之有云儀觀雅
秩德器靜深。雖恬淡疎于應時。而孤貞可以勵俗。識
者躉之。丙辰進貴州提學副使。中途感疾。遂慨然歸。
中丞玉華高公以公學行宜訓迪多士。促其赴任。而
公竟草疏上之。既得請。乃却掃衡門。一切世好如洗。
時年四十有七。自題齋壁云。浮生歲晏。是元城斷慾
之年。虛館雲閒。正叔寶閉關之地。丙寅巡方吉菴王
公疏薦。丁卯隆慶改元。巡方栗菴宋公又疏薦。吏部
題准起用。除浙江提學副使。方抵任。疾作。移檄乞罷。
中丞玉泉趙公御史任菴王公並勉留之。公下車廣
勵諸生。育才興行。時有選貢事例。公宣言曰。貢士于
朝而不先德行。胡以作人也。直指使者報如議。是歲
升黜稱當。進右叅政。戊辰進按察使。病不能赴。移檄
乞休。中丞應谷劉公謂其林居十載。望重一時。亟爲
勸駕。五月投劾歸。吏部寢不行。不得已赴任。進四川
右布政。己巳遞疏。皆寢。庚午進南京太僕寺卿。九月

又疏乞歸。又寢時僕寺法弛。公務張之。徐來等州縣顧役冗名。僞稟諸弊。一一釐正之。著爲令。民力以蘇。公庭清肅。辛未年六十有一。自惟三十年科名。四十年孱疾。皇皇風塵。跋前疐後。徒敝形神。何益。乃移疾墾辭。賜休沐居里。癸酉萬曆改元。江陵當國。以公負盛名。欲引以爲重。使操江都御史王篆致款曰。公幸俞此言。暫出。當以大司馬相推。公默然不應。篆要之甚力。竟不出一語。篆曰。坐久矣。我饑。公幸有以啗我。公亦默然。篆不懌而去。其子慶曰。何介介如此。公曰。江陵橫終。當有禍。篆非端人。何可與作緣也。久之。峽張公明臺向公交薦。十月進南京太常卿。公修舉禮樂。對越神貺。無不嚴恭。甲戌進禮部右侍郎。丙子國子監缺祭酒。會推首。公于是以原官管祭酒事。時丁繼母憂。十二月方服除。制中轉官。以彰異數。丁丑先後兩疏辭。言官以衰病論。公不報。旣而蒙溫旨留用。公扶病臨雍。發揮名理。敦獎行誼。六館之士一時

知所崇尚。彬彬興起。居數月。當秋祀。以足疾不能如禮。乞骸骨歸。甚堅。吏部具公清望而爲言。所以欲歸狀。乃准致仕。時年六十有六。辛巳夏。自知逝期。獨居一室。戒家人勿前。惟焚香若假寐而卒。蓋幾于委蛻云。萬曆九年五月十八日也。公賦性佷泊。在官什三。在告什七。淡默寡交。少年究格致之義。不得其解。參証內典。澄思靜照。久之有省。自言一日于幽獨中。恍惚見其良心。始知此心虛融周徧。而身內有形之心。非吾心也。所著有懲忿窒欲。編逍遙訣。測言閒雲館野語。宦蹟自警行世。遠近志于學道者。必推白野先生焉。華亭陸文定公稱其坐鎮雅俗。似房次律急流勇退。似錢宣靖洞明宗要。則楊次公晁太傅至其信道之篤。不言而默成。視理學諸儒。不知何如也。病懷云。簷前花落常疑雨。樹裏雲過忽見山。城南僧舍云。花宮雲氣香林滿。草徑藤蘿石磴新。晏坐偈云。丈夫自堂堂。脚底有佷路。撒手便歸家。何曾移寸步。子序。

嘉靖辛酉舉人。

張問卿祥字元吉家世錦衣衛千戶公爲諸生有文名累屈于有司貢爲泗水學博中山東鄉試嘉靖辛丑舉進士授鄆陵令入爲工部主事歷郎中遷萊州知府調楚雄陞按察副使苑馬寺卿公居官廉介按奸發伏聲績大著其令鄆陵操法得民巨盜不敢竊發摧抑豪右撫循疲弱邑中劉中丞陳都諫之家衆緝歛惟謹屏儒細民賴以安全它若繕城濬河利及一邑者詳邑志中聞繼母訃歸百姓遮留郊關外車不得進公停車慰勞邑人祠祀至今不衰在工部權稅兩浙又督福浙料價巨細之務均節有法繼掌虞衡會報商人大戶多以賂行公持正無所徇有以千金夜齋爲壽者峻却之守萊州萊民瀕海瘠土多散之他方公撫字之駸駸復籍亡命匿于諸島者時出劇掠備設法禁始帖然受約束公壹意民隱不能曲事上官因摺以蜚語吏部廉知其操守量移楚雄楚

雄越在萬里外。故饒礦井之利。公毫無所染。上官二氏爭印。久不決。聞公往鞫。百計賄求。公不受。惟據理判牒。二氏母敢譁。整飭洮岷。則通融茶法。剪刈牟食。番人震駭。無敢撓三尺。無何直道難容。當路者不能中以他事。而謂其年踰七十宜歸。公卽解綬歸里。跬步未嘗出戶庭。絕口不問有司事。茹淡服蔬。怡然有以自樂。終其身無他營。獨嗜書卷。丙夜不倦。日光炯炯。晝齡猶燈下作小楷。居恒謹重。不輕一語。至談天下巨務。則慷慨不休。性喜飲。然不赴宴會。但從所厚善。濁醪豆美。詣城南諸禪林。懽然道故。無間也。執親之喪。以毀瘠聞。旣老。事女兒。惟謹。曰。吾不逮事吾母。唐恭人事吾女兒。卽事吾母也。夫人吳氏白首相敬。先二十年棄世。未嘗置姬媵。卒年八十有七。余學士銘之曰。公將發洮岷。橐懸如洗。郡邑吏具數百金爲餽。而公力辭之。若將浼已。比稅駕。惟先人之四壁在。爾公食貧而甘之。終不以奇節自侈。非其中誠有所

得孰能與此。夫士或伸節于朝而惰行于里。乃公出
爲賢大夫。有赫其軌。入爲鄉先生。有淬其砥。得全全
昌。雖死不死。孫藩字茂楚。著有渡江蘇田桐君集。

阮僉事。字德載。京衛人。素性端雅。登嘉靖二十年
進士。授浮梁令。往令皆侵里中。以充橐。公悉罷之。民
困以甦。邑薦稷。公禱雨。暘立應。咸稱神君。云。入爲南
職方郎。大瑞夏。綬盜孝陵樹。當公按坐。如律。客有挾
其重資求解者。公太息曰。三尺法安在哉。拒之。卒不
撓。出爲九江僉事。風稜高。自位置。然凡事務引大體。
不苛細也。落落多所忤。丙辰上計。卒中忌者言。拂衣
歸。杜門著書。年八十餘卒。

張御史鐸。留守衛籍。嘉靖辛丑進士。以庶吉士改監
察御史。按遼。悉心經畧。規度要害。請建沿邊諸臺堡。
又積粟幾六萬餘斛。貯預備倉。以防兵荒。後十年果
遭大水。疫癘繼作。至人相食。賴此倉以濟。人咸謳思
之。祀名宦。

楊道南先生名希淳。母未誕之夕，夢笙籟滿耳，有羽蓋霓幢擁一仙官入室，遂生焉。幼岐嶷，日誦千言，爲古文詞，下筆立就。弱冠游庠，試輒高等，名籍甚。往從荆川先生遊，荆川大奇之。由是名益著。三吳豪雋皆倒屣願交焉。歸而弟子從之者衆。與同郡李維明輩相切劘，動以聖賢自待，不肯諧俗。累試不第，耿天臺督學南來，聞其名，首試以學，莫先于立志論，大加稱賞。因相與講明聖學。由陽明先生上溯孔氏，一日忽大悟曰：道在是矣。由是與人論學，圓明透徹，直指心要。人無不悅服者。素以方嚴稱。至是益和粹。人以方程伯淳云：以補貢至京師，時方題覆貢，不得補。少宗伯萬理菴雅重之，歎曰：予當爲國求賢，今賢者已至吾前而不能用，負愧多矣。于是禮部移文，定爲明年貢。歸逾年，忽病，偶有句云：病常欹枕晝猶夢，瘦不禁秋雨更寒。秦淮曲，誰家樓閣隱修篁。門對清溪一水長。細雨捲簾還日暮，數聲欸乃送漁榔。秦淮秋水接

長江。蓼岸平沙。白鷺雙。蘭漿漫敲波底碧。一鈎新月
墮蓬牕。東麓亭。攀來玉樹多春色。聽徹梅花半雨聲。
靈谷。縹緲珠宮。臨漢寢。鬱蔥佳氣接蓬萊。松濤散入
流泉響。花徑先逢野鹿開。又逸句云。才不才間聊隱
几。用無用處幾憑欄。自知逝期。爲書別知交。談笑而
卒。年四十二。嘗自爲墓志。謂人死當乞銘。我固無求
者。死後乃有求耶。中年發揮理奧。批郤導窾。皆先儒
所未及。臨終盡焚其稿。吳司寇搜其遺者梓之。

軼事載道南數歲。受諸經子史。一目數行。俱下。且了
其微義。年十四。督學胡公象岡。試孔子惜繁纓論。詞
辯川湧。意其爲宿學。批云。草茅中鸞鳳。及見其幼。更
重之。胡公旣奇其才。又惜其貧。遣就海虞錢公有威
學。因師友陳原習。唐荆川無不忘年敬禮之。館于梁
溪華學士家。華公尤器重。嘗贈金百兩。弗受。比歸。潛
置其書囊中。道南登舟。檢書見之。則回舟力却。乃去。
他日錢以告胡公。公爲却立咨嗟。謂一童子能抗志

乃爾。

盛時泰字仲交。骯髒負才。不問生產。卜築于大城山中。又于方山祈澤。咸構野築。杖策跨蹇。欣然獨往。家人莫能跡也。嘗爲子取婦。其妻囑勿他往。薄暮友人邀往城南古寺。閱數日乃歸。張肖甫開御史臺于句容。仲交大醉。搥鼓于戟門。肖甫曰。安得有此狂生。必盛仲交也。邀入痛飲。達旦而別。善畫水墨竹石。文徵仲題其軒曰蒼潤。以沈啟南有筆踪。要是存蒼潤。畫

法還應入有無之句也。携兩都賦謁王鳳洲于小祇園。鳳洲贈詩曰。遂令陸平原不敢賦三都。又和鳳洲擬古七十章。三日而畢。見者奪氣。雨臺林花雨霽。雙峰出雲。木涼生一鳥鳴。燕磯陰雲翻浪。明秋日霞氣蒸林。生晚霏春雪。誰云六出後。猶作五花飛。茅山一徑穿雲上。千山送雨來。鳥飛青嶂外。人語白雲間。福安院山深秋氣重。谷遠磬聲遲。斷臂巖羣山迴合處。棲息秣蘿烟。萬木迎寒脫。孤燈入夜懸。月同僧意寂。

風與客懷牽。林外雙峰影。高樓獨對眠。上莊山色迎
人出。梅花度水香。燕泥留雨氣。魚藻入天光。訪友山
從千嶂繞。徑向一林分。水滿漁竿覺。苔香屐齒聞。祈
澤寺。入門芳草色。出世法王心。簷樹影雙動。山禽時
一吟。衡陽寺。泉上苔將合。幢間字半磨。寒烟連阜白。
落葉近苔多。龍女聽經後。山精幾度過。鳥聲依澗樹。
蛩響出庭莎。憑虛閣。幾處東風迴。弱柳千巖雨。色潤
垂藤香。筵寶座。初聞梵塔院。蓮龕正試燈。又夢游華
山。得句云。幽谿渡麋鹿。壁上藤蘿懸。所著有遊吳雜
記。遊燕雜記。大城山全集。佘牘記。

仲。交子敏耕字伯年。有雋才。著軒居集。山居云。花癸
臨危岸。鶯啼過遠林。贈友。潮聲繞屋初消雪。梅蕊知
春競放晴。三台洞。石扉藤蔓迷樵路。流水桃花引客
來。送廬山僧。送客溪頭防虎嘯。逃禪樹底借枝封。
向知州翼字序伯。嘉靖癸卯鄉薦。登下鍾寺危磴。苔
封滑。虛壇草色幽。中秋泛月。風動魚龍吹沸浪。露寒

蟾兔泣清秋。公別號二淮。任興國知州。曾雪羅二之
冤獄。夜夢閱應天試錄。有向德象名。云是公子也。公
之子名辰參。久不得入泮。因憶昔年之夢。改名德象。
遂中萬曆辛卯舉人。有集名二淮稿。

沈孝廉九思。號頤貞。上元縣人。世父琮起家進士。爲
御史。公童卯有亢宗之志。侍親盡孝。父病。籲天請代。
病遂瘳。弱冠補弟子員。爲督學楊衡水所重。公持已
益莊。私居整衣冠而處。言動以古人爲法。嘉靖癸卯
舉鄉薦。遊南雍。發憤攻苦。呂司成文安公稱曰。畏友
而不名。丁母憂。哀毀骨立。賀黃門涇心折。公時里中
勲貴人。爲黃門所持。橐千金謁公。居間。公辭之。旣而
歎曰。夫夫也。非以吾能振人之急乎。吾唯不爲利已
耳。奈何不一爲故人地乎。于是言于黃門而解之。勲
貴甚德之。子鳳翔。萬曆壬辰進士。

姚鴻臚澍。字元白。弱冠入太學。力學嗜古。游情翰墨。
居秦淮上。闢市隱園。日與名勝賞詠其中。天性孝母。

病脾醫不能療。剗股作灸以進。自是病漸愈。更壽而康。嘗拾遺金一囊。候其主不至。盡出以周貧乏。謁選授鴻臚。告改南謝去。不交當世。尋幽賦詩。瀟然自得。畜古玩。精鑒識。詩宗大曆。書法趙黃。寫梅稱逸品。子之喬。字佺胤。文雅稱世美。云佺胤詩句。寒花照座金。爲葢。明月窺簾玉作鈎。

鄭司理河。字師程。江寧人。中夫之孫。登嘉靖甲辰進士。江上感懷。愁容難爲別。閒雲漫不開。天地水爲際。江山雪滿樓。

蔡通許銳。字抑之。留守左衛籍。家貧養母盡孝。端介不苟。人有過。面折之。爲博士弟子。每試高等。顧屢困場屋。提學真定楊公名知人。閱其貢卷。歎曰。豈有如此才。而以偃蹇終乎。果中嘉靖丙午鄉試。又再蹶南宮。謁選河南通許令。卓有政聲。以不能媚上官。遷杭州府學教授。始至。勵廉隅。端軌範。士始憚其嚴。未期月。翕然尊信。曰。古君子也。越四年。竟以不能俯仰。遷

襄府紀善去之日士多裹糧相從至數百里外者立去思碑于學宮至今人猶稱之歸而環堵蕭然豁如也年八十餘卒

嘉靖丙午舉人薛盤之父素買卜榜後親友皆勸令勿賣卜薛老搖手曰此資身生計何可廢也及子未沾一命而死乃云盤中舉時占得斷橋卦如何靠得他若當時從親友之言今日有何顏更賣卦乎其尤驗者武宗南遊欲見活虎獵人數日不獲武宗遣一宦者問薛老薛云明日不過午時當見虎次日如其言武宗以米賜之

梁同知楹字汝直府軍後衛籍嘉靖丙午鄉薦爲鹿邑令遷眉州進南郡二守憂歸補湖州遷荆府長史致仕公治鹿邑廉慎恤民隱剔吏蠹百姓爲之興歌治眉眉之玻璃江源出岷水至武陽與邛水合江勢悍暴轉徙不常宋魏文靖守眉作墓頤堰記以爲東流則病堰西流則病城截江爲捷而醜渠于東西之

兩間城與堰兩利焉。後此議者紛沓，績用弗成。城益危，公至察水勢，見與文靖合，不以間阻，築堤斜截大江，導使中流，長百八十丈，有奇，不二月遂成。至今賴之。後去湖，湖民懷思有加。公性醇厚，若無能而所在。謳吟思慕，歸田屏居林野，耻自炫耀。人鮮知者。在官二十年，于舊業無絲粟之益。同年宗伯袁公洪愈、五六輩同官留都，重公爲人，與結社。人謂有香山洛社風。

路大行伯鏗，字東溟，嘉靖辛丑進士，座主溫公。仁，和以公夙名，薦拔詞林。公讓同年張公鐸觀政刑部，大司寇國士待之。時郭武定勛進方士，良朝用術，敗論死。武定已坐事繫獄，懼並誅，其家以千金爲壽。求一言，公亟麾去。授行人，使楚藩，却厚贈，朝論躋之。著脩閒齋集。仲子九同，隆慶丁卯賢書，選通山令。歲荒，民流亡，下車卽借庫金糴穀，境外立粥藥局，布袍革。烏晝夜拊循，哀鴻集澤。公以糧運，民不堪，命力請改。

兌。佛。當。事。意。笑。曰。事。既。得。行。足。矣。值。科。試。府。檄。公。閱。卷。首。拔。熊。公。廷。弼。道。遇。之。芒。屨。負。笈。贈。以。履。曰。子。奇。士。也。勉。之。後。熊。公。來。督。學。執。弟。子。禮。晉。謁。弗。見。也。歎。息。而。去。著。滄。適。齋。集。二。十。卷。

歐陽序字維禮江寧人能詩工篆究心名理謁選福州府幕太守耳其名獄訟多令訊決署閩侯官不妄刑一人不妄取一錢嘗蠲俸以償贖鍰持平以釋大辟郡人德之弟廕字惟玉以闈幕署臨安篆亦有聲黃銓部甲字首卿上元縣人嘉靖庚戌進士岸然以文章自負嘗自敘其集云皮相之士不足以求人才夜糴之人不足與論國是僞鳳悅楚真龍驚葉蓋自惜鑑裁之難焉公于書無所不讀既以才取忌閉門手一編取酒獨酌自稱蟄南山人著編年稿獨鑑錄皆秘不示人評論詩文多前人所未發性寡諧居鄉與往還者不二三人詩句人爭傳之不寐云乾坤燈下影魂魄枕邊書山齋云月出僧因過船歸鵲正飛

園亭曲徑沿溪入。疎峯帶雨青。春日鳥聲侵夢斷。竹
色映階虛。秋興山高月出鴈。初下水遠天空人自愁。
天寧寺短劔孤懸凌夜月。敝裘初紉薄秋風。有鳳巖
山房全稿行世。生四子。皆負雋才。祖儒有諫鳳鸞覺
集成儒有競辰齋集。方儒有陌花軒小集。復儒有振
秀閣集。

楊用修王元美品梅花詩。皆取老杜幸不折來傷歲
莫若爲看去亂鄉愁。李商隱玉鱗寂寂飛斜月。素手
停停待夕陽。令淡烟疎影之句。減價首卿野客珮寒
星欲墮。佳人釵煖日初融。焦弱侯花開歲暮人歸後。
香滿寒庭月上時。亦稱絕唱。

馬慶元汝猷字誠望。錦衣衛籍。年十四遊京庠。嘉靖
壬子領鄉薦。仕慶元。令歲值攢造。公曰大造繫十年。
利病可容奸胥私弊乎。遂率而盟諸城隍之神。書誓
辭于兩楹。晝夜親閱。纖毫不假。再踰月冊成。當道賢
之事載慶元志中。以才望受撫院檄。禦旣聞劇賊李

文標公率鄉兵左右之滅賊入覲過家遂謝不赴公
恬靜隱厚有陰德買地城南瘞暴齒五年積千餘副
嘗貸邵氏金無券邵歿其家不知也必致還之居恒
泊如不自鳴其善書法逼右軍卒年八十有二新秋
詩明月半牕能自至白雲滿榻似相留永寧庵山色
遙連秦樹碧溪聲常帶梵鐘幽

何叅議汝健字體乾鴻石園詩坐久花香細談深鳥
語微灌園天涯飛鳥外人事落花初牛首山色有無
朝雨後江光隱見夕陽時雪夜檻外冰花侵履跡庭
前竹翠濕人衣公別號龍厓嘉靖癸丑進士性寡交
遊惟喜獎拔後進如濮州之馮祿冀州之李再命皆
于齠年識之爲之延師訓教買田供給復爲之延譽
皆成名士李與公之子湛之己丑進士同榜馮聞公
夫人死偕妻南來斬衰哭于墓下其感人之深如此
著有竹素園稿湛之有疎園集

公宦濮州時夢孔雀入室遂生次子淳之因作孔雀

賦以紀其事。後仲雅巡按福建。子森如夢一孔雀冲天而去。不數日閩中訃至。

體乾公之祖岳。號畏齋。偶夜行。拾遺金二百餘兩。不使家人知。次早携至拾銀處。見一人倉惶尋至。問其封記與銀數皆合。遂以還之。其人欲分數金爲謝。畏齋曰。拾金而人不知。皆我物也。何利此數金乎。其人感謝而去。又曾教書于宦官家。宦官有事入京。寄一箱數百金。曰。俟他日來取。去數年絕無音信。其侄以他事至金陵。原非取箱也。畏齋堅托以寄去。吉甫曰。一窮秀才拾金而還之。又寄金盈篋。數年畧不動心。其過人遠矣。

胡編修汝嘉。鷹揚衛籍。嘉靖癸丑進士。累官翰林院編修。以言事忤政府。外調公文雅風流。不操常律。所著有菑園集。沁南稿。行世。小說數種。甚奇艷。隸書師鍾元常。草書師張伯英。崔子玉。常取三人書之。在閣帖者。從宋榻本手摹刻之。較今所傳閣帖神檢殊勝。

張草中耳字長尺餘。今此本在中州。子夜歌云。黃鳥
鳴深林。往來疾于織。非無機杼聲。其奈不成匹。黃華
山林鴉翻暝色。巖樹駐秋雲。嘯臺淡雲千里色。落日
半巖陰。

王太守可大。字元簡。嘉靖癸丑進士。顧太史鄰初傳
公官比部時。與同官張公翀同草疏劾時相嵩。以母
栢安人泣論而止。卒爲所中。左其官。後再起守瓊州。
撫海賊有功。尋解綬歸里。著述甚富。書法規撫徐九

峯。金山農晚。又出入鮮于伯機。自謂能得其意。生平
高自標置。遇非所愛。索其一字。亦不可得。公壽州渡
河詩。沙淨空山雨。風香野岸花。所著有三山彙稿。三
山續稿。國憲家猷。白雲稿。

王丹丘可立。西冶吏部之幼子也。少有高韻。爲諸生
謝去。翛然塵外。家有小園。蒔花木自娛。客至焚香煮
茗。清言相賞。同母兄少冶富厚。一無所干。求布衣蒲
屨。安貧自足。七十後猶手書所纂小程史諸書數十

卷字細如蠶足蠅頭其猶子以杉板奉之公却不受
曰吾自有具矣年九十而終
姚元亮貞題別業詩句墨香臨帖後茶沸罷琴餘檻
竹報晴仍帶雨瓶梅裹凍固留春

卜封公璠號樸庵生而慈仁喜周濟行年五十卽不
關家務日以施藥掩骸放生葺路爲事預卜地于牛
首山之側中途見負擔于暑中者咸苦渴卽以其資
穿井濟之井在鐵心橋有碑亭邢雉山太史爲文記

其事嘗過一橋聞其下哭聲甚哀跡之則夫婦爲債
家所逼挈幼子欲自盡也因語之曰何至是急與之
金以償之次年冬返吳江夜深舟覆與家童及舟子
攀舟底飄數十里不見一人寒甚忽見前岸一燈往
叩其門不納哀懇再三乃開門則昔之橋下人也夫
婦拜呼爲具食燎衣次早爲之易舟以行居恒教子
孫以忠孝寬仁每取古人言行可法者筆于冊以誨
之子鎗孫履吉皆掇巍科益諄諄教勿驕矜期以濟

民利物上報君父晚更留心佛法壽八十有七預言
來歲臘月念四日午時當歸至期沐浴端坐問時午
乎家人不忍言曰未也呼合家拜別家人又不忍拜
曰何不達也生之有死能違乎拜者失聲乃曰何不
念佛助行而作此態候視良久乃逝矣身不少欬三
日就歛面光如鏡

姚太守汝循字敘卿錦衣衛人自少穎悟性喜簡易
髫年入京庠未一月登賢書嘉靖丙辰聯第知杞縣
擢南刑部主事出守大名政尚平恕郡故土城當河
流之衝公伐石起陶築之高厚堅實至今屹然嘗抵
宦家子于法得謗當左遷遂屏居十年起桂陽同知
遷嘉定州多惠政糾鄰郡平大盜蔡百貫屬當入覲
直指以其官廉道遠假以郡符時江陵嚴核駟傳竟
至褫官居家闢錦石山齋儲書畫尚節儉喜施予晚
年究心名理皈敬白業親故貧乏者周卹之往守大
名謁直指辭行兩舍矣其僚乃同鄉人也聞其獲重

謫于直指。亟迴車救請。哀懇得免。乘夜令其去。郡用情之厚。皆類此。有錦石齋集。耕餘浪遊諸集。行世閒居詩。露香催酒興。月皎逗琴心。綺霞閣酒邊。過白鳥鏡裏出。青山泛秦淮。潮起輕風生。遠浦夜涼。明月滿扁舟。柳岸秋清夜。汀葭月白時。宿三山別業。落日楓千樹。殘霞鴈幾行。禪房閒花苔。上落清磬雨中沉。送友離愁隨草長。別淚迸鶯啼。

公有丁糧議曰。國家賦役二法。亦監唐宋以來而損益之者也。大都有丁則有役。有田則有賦。卽唐租庸調遺意。奈時久則事增。事增則役繁。周文襄創爲勸借之說。以糧補丁。然不過十之二三而已。至巡撫歐石江公。役益繁而人丁益不能支。于是有均攤米與人丁均編而賦役二途。遂合而一。雖權宜救敝。不得不然。而與剗制之初意失矣。至今日編差則人丁止居四分之一。糧石反居四分之三。本末倒置甚矣。夫議法不求其原終。非盡善。今雖無可奈何。而安可不

示存羊之意耶。故議丁糧以俟將來議法者考焉。一曰寄莊議。二曰改兌議。三曰糧里議。詳誌中。朱僉事潤身字海峯。江寧人。嘉靖壬戌進士。時嚴介溪當國。欲招致門下。先期以鼎元餌之。公拒不應。抑置二甲。并罷是科。選館授吏部考功。遷雲南僉事。土酋鳳繼祖執張僉事以叛。公與直指謀用間謀募死士。指示方畧。繼祖授首。被人言告病歸。築室天闕山側。蒔花木自娛。至今手植滇茶名卉猶存。著海峯先生遺稿。

焦千戶文傑字世英。旗手衛人。少孤自立。生平伉直不欺。無違心之言。無違心之行。在職四十年。履素如一日。嘉靖庚申振武營兵變。大司馬無措。啗以厚賞。攫賞者紛起。公按劔戢所部。無敢譁。司鐘鼓樓樓圯。司漏者多慢不事事。公獨移文工部修葺。攝諸疇人子弟供事如制。通州吳主簿者。部糧寄八百金。簿暴卒。家人不知金所在。公舉還之。仍護歸其喪。公三子。

皆教以詩書。瑞以選貢授廣東靈山令。廉甚。人或言其不以祿養公。曰：兒所持是也。季子竑，甲子舉人。公以仲子靖襲其官，遂獨居一室，絕葷酒，持經禮佛。時曳杖竹林，俯青溪，眺鍾山，婚嫁應酬，一切不問。年八十卒。卒後五年，己丑，竑狀元及第。

焦靈山瑞，字伯賢，清方謹，勅不妄語。弱冠爲應天府學生，授徒爲活。束修必程其學，而後受。有終歲不受一錢者，曰：教未有益也。以貢授靈山令。時一條編法已行十餘年，有司以僻遠里甲之供如故。公至，首罷之。民始洒然有樂生之望。縣多叢菁，羣盜嘯聚，督撫檄劉節推勦之，被執將加害。公率衆往援，賊見驚，拜曰：此真吾父母，奈何犯之？遽歛去。乃救節推還，俘斬且衆。竟不上功。幕府故賞亦不及。嶺南去天萬里，仕者率取珠翠以自潤，漁利之孔悉罷之。有牛稅沿爲縣用，亦貯之庫。凡絲粟之費，必以已俸償之，不支一錢。縣產熊膽、天竺、黃花石諸物，上司不時需索，皆力

辭百姓恐失公成願輸以緩其怒固不從然終其任亦無取靈山一物者慮賊窺伺武備單弛檢諸兵訓練之以銀爲射的中輒賞之由是諸兵競勸賊不敢近見邑士不勤于業督課忘倦月試加賞勵人人自奮權相柄國賦歛嚴急鄰郡縣爭爲刻深赭衣塞道公嘆曰吾忍以民命博一官乎以疾告歸徒步辭上官不復駕靈山輿矣先是督賦嘗出俸百金爲民代償去官未幾輸者滿額攝者盡以返之卒不納曰吾業已心代之不忍易吾心也歸之日囊餘八金半皆曩時射的也卒于途聞者惜之後湖有伯賢詩無數浮鷗天上下幾重樓閣樹高低

黃別駕尚質字宗商水軍左衛人少貧以筆耕養其親嘉靖戊午舉于鄉授劔州學正監司知其賢延主省城大益書院旋聘陝西鄉試首拔司徒溫公純稱爲得士攝巴會妖寇蔡百貫作亂躬自捍禦郡賴以安改峽江令地疲賦逋公不事繭絲監司行訪每以

微青當巨憝公不忍也一無所開報驛有羨金歲暮
輸于縣公大詫之謂卽不能還民姑存之以減來歲
額派可耳山漁舉網得筐金千里豪誣以盜漁人懼
獻之官公曰此天以資貧民也麾之弗視入覲里甲
舊有餽金悉拒之萬曆初詔雪練子寧遺嗣流爲廝
養久矣公多方覓得之復其姓立祠買田俾主其祀
獨以責逋不滿限尋擢饒州別駕嘆曰宦拙之效如
斯已竟投檄歸居家敝衣糲飯一如居約時李維明
鄉之論篤君子也嘗曰不以身涉仕宦而二其操不
以中更坎壈而變其塞今見之宗商矣
李新野登字士龍上元人弱冠入京庠嘉靖辛酉耿
天臺督學南畿簡卓異者以風多士公居一焉以選
貢授新野令至則勵士風嚴考課值歲凶設糜賑饑
徐置義倉改贖緩折穀以實之活者甚多條陳興革
俱切時宜上之當道民陰受其賜以抗直忤時改諭
崇仁乃立社與諸生講明鄒魯之學一時翕然興起

至有成名儒者所著有顏學編寶唐語錄又以不能承事邑令成郟當事欲伸公而抑令公寧去官以全令處林下三十餘年惟以倡明正學爲務卒年八十有六

常照磨信字國寶興武衛籍孝友多才精六書繪事至靈樞陰符之書無不究心世廟未以善書爲印局使遷撫州府照磨太守胡公性嚴重察公可用託以辨花園港有巨盜嘯聚行劫商旅俱絕兩臺委公公詭爲日者服采入其阻密圖其地形并芟險建置之策甚備于是擒渠魁十有三人羣盜悉平臨汝間悉倚公才望爲保障聞母疾委手板歸甫兩月母卒以得供藥餌親含歛爲幸後復從耿天臺學嘆曰吾疇昔所爲殊孟浪也冥心內觀超然有得著有同文北上諸集焦太史弱侯爲之傳曰國寶年十二父臥疾卽焚香顙天願以身代厥疾用瘳玉田盧公以行誼伏一時最慎許可一見奇之以其弟之子妻焉在

撫州時府事悉倚以辦。如清陳鄧積年之訟，散青泥蜂聚之窟，定北門之宵變，還府庫之亡財，所嚮有濟。然素豪舉，無脂韋態，用是人多不樂，而國寶亦不樂其官矣。色養三十載，日具小酌奉親，稍沾醉，自歌以侑。比親亡，花晨月夕，泣下沾襟，曰：安得復承膝下之歡耶？歸田勵學，冷然物表，一切外膠，不以動其心。可敬也。又曰：盧公獨契國寶，然國寶待之有本末，恩禮不衰者三十年。盧公家貧，蒔花爲娛，菊譜成，不能行也。國寶賣所佩劔，刻之以傳，嗟夫！世人多于貴盛時爲人盡力，及稍稍衰落，棄去之，如不相識，豈可復以人理責耶？而國寶不然，其賢于人遠矣。

朱沅州衣字正伯，錦衣衛籍。少與楊道南、焦澹園、金佺予同遊處，以侗儻鑒古稱。嘉靖甲子，舉于鄉。辛未，謁選臨淄令。邑多逋賦，乃令里各置櫃，自投，民皆樂輸賦，更早完。以憂歸，調房縣、房巖邑，令多被告，許去訟牘，填委。公至，斥訟師，鋤強猾，月完積案七百有奇。

民乃懾服。邑有巨堰，爲有力者據，擁水專利，侵害民田。公多方疏築，歲灌千餘頃。邑人便之。五年，遷守沅州。將離任，會礦徒作亂，撫臺檄公率民兵治之。公輒往，下令持鐵者賊，空拳者民，不得妄戮。乃獲倡亂者戮之，餘黨解散。沅近土夷，防守兵以餉不時給，揭竿鼓譟，爲變。報至，公曰：「非反也，迫于饑耳。」先遣牌撫之。期以翌日予餉，衆疑信間而餉果至，亂遂息。擒其首四人，寘之法。舊郎守忌之，銓部議調，遂歸。儲名書畫古玩，蒔花卉，以自娛。長于詩詞，神策城樓望，佐武湖云：「湖光盪雲日，山色映寒流。弘濟江閣，孤帆蕩漾綠何事。遠岫依微，莫辨名子之蕃乙未狀元及第。」

鄭武選宣化字行義，家世隸龍江衛。舉嘉靖乙丑進士，授袁州府推官。潔已奉公，入爲南工部主事。權蕪湖公以廉自礪，謝請托，斥羨羸。有奸商偵公父家居，以百金請欲牟免，以規利。公卒抵諸法。改南吏部，服闋除兵部武選司郎中。先是，軍官襲替，夤緣詐冒，奸

吏因得上下其手。弊端百出。公既孤立。一意振滯。倖竇會大選。有所降斥。時王少宰要結權勢。傾動朝野。欲以其甥百戶冒襲千戶。公覈罷之。一日時相出片紙。以錦衣某官掌衛事。公固陳不可。遂激其怒。外調邵武守。多惠政焉。贈友詩。飲酒自應忘爾汝。簡身端欲去。今茲旅行過。雨山峰潭底翠。夕陽茆店柳尖紅。海日倒啣天外影。江雲遙落座中杯。著有成趣園集。金遷安光初。字佺予。江寧人。勤修嗜學。不尚財利。隆慶丁卯。舉于鄉。授奉新令。起復補永平。遷安所至。民樂其簡易。然折獄鋤奸。咸當其辜。任遷安二年。入覲。卒于邸舍。同里焦太史王尚寶。醵金歛之。橐中之餘。裁七金耳。從尉及吏胥輩。人人哭之。盡哀。其政平恕。不爲赫赫聲。歿而後。以廉見。焦太史弱侯曰。佺予爲人外若夷曠。內行修飭。不自點于利。績學勤敏。明習世事。洞然如數秋毫。而墨墨似不能言者。嘗稱曰。治民無他。無擾之而已。可謂識治體。

李翰峯先生逢陽字維明。金吾後衛籍。幼端謹如成人。家庭顰笑不苟。盛暑恒整衣冠。危坐終日。無傾側容。與人交誠意懇至。人不忍欺。亦不敢慢也。視世人沒溺利名。若將浼焉。爲諸生時。大京兆喻時延以教。其子公以師道自重。出入未嘗左顧。見者肅然。喻亦重之。戊午舉于鄉。喻京兆實薦之。公聞之弗善也。絕不謁謝。喻亦不介意。時論兩賢之。公篤孝。母沒哀毀骨立。啖蔬處外。三年悉如禮。舉隆慶戊辰進士。時方選庶吉士。公本第七人。當道雅屬意焉。固避弗就。乃授戶部主事。改儀部郎。奉命遣祭楚王。事竣以百金爲贐。卻之歸。未幾友人楊道南病。公親視湯藥。或謂宜少避之。不從。及楊卒。未浹旬。亦竟不起。年僅四十。公篤于踐履。不事空談。以名節相砥礪。嘗語所善者曰。學校風俗所關。須厚自待。世間兒曹態不足慕。傲也。願後來者勉之。及見天臺先生。乃曰。吾不聞學得爲古之矜者。止爾。今而後知學之不可已也。吳司寇

刻其集有翰峯遺稿

吳伯恒先生自新江寧人幼穎敏絕人丰儀玉立弱冠爲諸生有聲耿天臺督學政首拔之與之論學駿駁度越流輩登嘉靖甲子亞魁隆慶戊辰進士授工部都水司主事出董徐呂洪務補營繕司擢守杭州陞按察副使進布政使司遷太常寺卿以右副都御史巡撫河南召爲南京刑部右侍郎公初任治河審擇便利杜并緣乾沒之姦罷不急無名之費總總爲萬全計司空鎮山朱公中丞見海翁公皆稱公爲遠大器繕部督工大內故事貂璫以徵材交驩主者公絕不與通按役稽工程材授糈宦官無敢侵漁其間杭故難治公敦大靜深不侈威聲而剔蠹除奸不肯少貸有廢勲貴匿重犯章某于家公執其翼虎若干人刈之而論章某如法勲貴乃潛遁郡有豪宦當大辟公按如律監司怵其勢屬公寬之公寢不行後直指使者以取訊故詭出之然竟不敢睨公戶有寃民

滕某累歲不決。公廉得誣狀。立破械釋之。其人感泣。範金爲公像。虔事終身焉。織府金巨萬。前守多利爲私橐。公一一檢核。不濫出入。每歲省數千緡。杭人曰。昔大司徒梁公以清正著。今復幸有吳公矣。公暇則弘獎文教。日引諸生課藝。士風爲之一振。爲副使備兵溫處。公稔知承平法弛。核軍實。杜吏弊。水陸總哨。有不知兵者。悉汰之。海防肅然。加叅政督儲。公先予之期。至期無敢後者。坐是上計。獨先他省云。按察案牘盈前。一見立解。揚清激濁。風紀澄清。尤精于法律。能令老吏震懼。繼爲布政。久于其地。益諳機宜。主藏吏以餘金例進。公叱而懲之。歲積羨金。悉充兵餉。幕職領差。往往請託。公以敘而遣。卽有力者。不得越次。歲歉賑卹有條。全活甚衆。開府河南。諸務傍午。公調停區畫。尤加意武衛。以戒不虞。時宗藩驕橫。公于每宗。選其俊彥。各占一經。爲宗學長。始皆斤斤奉法。會陳卒。以餉不時聚而囂。公立逮首事者。誅之。脇從罔

問咄嗟而定。陞南刑部侍郎。卽與諸司約。謹官箴。慎
交與。簡聽斷。數十言。人共遵之。視篆兩月。疾卒。公才
望隆起。雖晉秩卿貳。士大夫猶惜不竟其用焉。天臺
先生深重之。常語門弟子曰。誰謂伯恒不講學。伯恒
語默動靜。無非學也。中丞及臬李公。嘗稱公履中正。
樂和平。人以為知言。自幼卽毅然以聖人爲必可學。
然不侈辨說。惟闇然自修而已。泊焉無嗜。獨嗜詩書。
起萬卷樓以藏書。晚而好易。宦邸構洗心軒。家有玩
易窩。每怡然會心。發舒闡奧。居常擇地而履。比遇形
勝。未嘗不探幽矚奇。以寄遠懷。與人交。開朗無所匿。
尤敦孝友。里中稱其家法。好汲引名流。遇片善輒獎
成之。不倦。自省署。歷藩臬。開府。以至侍郎。所推轂賢
士大夫。遍天下焉。佷武湖詩。樹色含風冷。溪聲帶雨
寒。湖陰夜泛。九天忽駕水輪出。萬里遙瞻玉鏡開。遺
稿有大受錄。子汝璟。癸卯舉人。或傳公謁選過徐
之某驛。役夫例應踐更。其丞靳不與。從者速之。乃呶

麥詩金
嗽出不遜語。未幾公分署徐呂。丞其部下也。竟不校。守武林。有狂生以訟謀強干而不得。乃大恚。後乘公宴客。突入訕公。公第遜謝。狂生忸怩而出。友人楊道南。李維明相繼早卒。公搜其遺文。捐俸合梓之。中丞滕公少松卒于浙。與其門人執友治其喪。經紀其家事。蒙賜廕謚。公之力也。生平不立崖壑。親之者若負暄。至遇所守。屹不可搖。馭屬吏不以小法微文佐喜。怒有細過必彌覆之。一善則獎借之。聞海內賢人君子。輒願執鞭。或遺軼在野。多方汲引。樂善慕義。其天性然也。

卜長史鏜。隆慶庚午鄉薦。送友還吳門詩。衰柳帶烟迷遠浦。片帆隨鴈下長州。遂閒堂日高臥。榻茶煙細。晝靜簾鈎樹色新。著有三華館集。

宋兵憲存德。字惟一。嘉靖辛卯舉人。溥之子。登隆慶辛未進士。轉南曹。述懷。櫪下驪駒淹歲月。庭前蒼檜飽風霜。著有鴻雪稿。

蘇詩金
楊秀才一洲字伯海好遊名山足跡幾遍五嶽曾以
山水圖寄謝茂秦秦荅詩云神會江天月名傳海月
風君才變化理吾道寂寥中

棲霞僧興善本縣人也丰儀散朗慧辯超羣張濂濱
御史邀耿天臺遊棲霞甫入方丈濂濱曰如此江山
有高人否善從旁對曰有濱問是何人善云便是二
公濱云如何援儒入墨善曰才有分別心便不是

金山人鸞字在衡偶渡江同舟一人無渡錢且有饑
色金代給且飲食之後數年往真州過驛門一人相
呼乃前同舟者也以事問徒銀鐙驛中鸞問所以
其人泣曰得銀十二銖卽脫矣鸞如數與之後二年
于湖廣江中遇盜登其舟已胠篋矣忽一人從後呼
曰此非金先生耶鸞應曰是也其人執鸞手痛哭告
其侶曰此吾大恩人亟哀已囊銀十三金腊肉數十
斤爲贈鸞臨別語其人曰汝良家子不宜爲此其人
垂泣而別山人寄趣高脫嘗與盛仲交期于城南高

氏家天寒且雪。久之方至。主人問曰。翁今娶婦。胡能
來此。在衡大笑。呼酒談笑。移日始去。咏柳堤云。雨香
飛燕促。風煖落花輕。除夕云。空江積雪添霜鬢。細雨
疎燈共一樓。北河道中。歸鳥亂啼原上樹。夕陽多在
水邊村。送友客中。候曉霜如月。馬上逢春草似烟。徐
太傅園。楊柳晚風靜。芙蓉秋水香。悼梁姬。江梅空索
笑。湘竹自成斑。通津驛。風輕雲氣薄。月淨水光寒。夢
鶴竊歸靈藥。三山月。吹落梅花一笛秋。岳少保墓。臨
危叩馬書生口。力主班師宰相心。憶江南。風簷聽竹
心先碎。雨檻移花夢亦香。著有蕭爽齋樂府。徙倚軒

集

薛成安應和字子融。號霞峯。江寧人。幼卽方介。舉萬
曆癸酉鄉薦。爲成安令。往例率取羨于民。公歎曰。我
拜朝命以來。而盜民乎。屬大比。分較于秦。榜首出其
門。時稱得士。三年丁外艱。徒跣奔歸。養母戀戀不復
出。居家三十一年。公府無片牘。卽子弟就試。不爲通。

也脫粟草蔬僅給于腹友叢太字母死爲傾橐助之
故人潘闞張三翁貧不能殮皆任其喪葬而先生之
歿則遺命箔殮木用婺云

顧與治記

余司成孟麟字伯祥萬曆甲戌殿試第二人仕至南
大司成攝山訪雲谷詩落葉一辭樹秋聲多在山燕
磯龍蜃兼天起帆檣掛日飛山居閒身稱病易春色
閉門多花深雲不去水濶月全低香山寺寶幢雙結
雲中樹石竇斜啣檻外峯送楊道南之楚風塵傲世
遊偏壯貧賤藏名道益尊公嘗以金陵諸名勝二十
景各著詩紀之曰鍾山曰牛首曰梅花水曰燕子磯
曰靈谷曰鳳凰臺曰桃葉渡曰雨花臺曰方山曰落
星岡曰獻花崖曰莫愁湖曰清涼寺曰虎洞曰長干
里曰東山曰冶城曰棲霞曰清溪曰達摩洞約焦澹
園朱蘭嶠顧鄰初同賦共一集曰雅遊篇朱顧兩
太史又有金陵四十景圖詩記之
顧副憲國輔字惟德祖以幼孤鞠于張遂冒其氏隸

籍金吾衛登萬曆甲戌進士由刑部郎中出守襄陽
晉浙海憲始請復姓公至性孝友奉親色養備至伯
有子弗能養暨張氏子貧並優贍之終其身居刑曹
清慎時江陵當軸同舍郎疏攻之張並啣諸同舍屬
當讞囚公有所矜釋江陵勿置也公抱牘面質于江
陵以原情不能移而罷始入襄屬久旱首倡便宜賑
濟大雨如澍五歲五稔中州之流民就食者以數萬
計公多方活之爲具資斧遣歸郎卒叛詈制府毆監
司監司夜趨襄襄卒亦以效尤往往偶語公諭以大
義屹不敢動推官薛曜多不法公數裁之曜怨望會
分守以他故中噉公當擢浙憲時以考功法中傷之
調守寶慶數月卒于任公所至飭吏治尚清淨民甚
安之與人處直致無所飾四子皆高才起元戊戌會
元探花起鳳庚戌進士起楠文名甚著早卒起貞辛
酉舉人爲江南望族

顧太初以詩美王與竹方伯曰遺風自許從先進古

道真堪式後生胸次幾曾忘坦蕩口端終不掛譏評。士。君。子。所。難。
與竹名橋萬曆甲戌進士高懷雅量喜延佳客相對
以大尊置坐側計壺命侍者溫而進之盡其所有而
罷嘗至一貴戚家以十大碗一百杯進欲以難公也
公徐飲畢策馬而歸

張參議後甲字丁也家世鷹揚衛指揮僉事幼就塾
師日記千言萬曆丙子亞魁丁丑進士授辰州府推
官明慎用刑有士人忤豪右文致成獄亟釋之後舉
孝廉又奸民斃其女誣人陷大辟公爲昭雪一旦免
十年之繫五開卒戕戍長官民震動公猝發捕逮渠
魁置之法其黨解散遷戶部督草場中貴與賈人窟
穴其間公執法盡犁宿弊引疾起補繕部時以營建
徵木公引繩程度奸商計詘中涓憾之弗爲動晉四
川按察參議征播之役兵興如螫彈壓有方居民安
堵以疾歸公孝友性成瘞骼至千餘具稱厚德君子
湯知府有光字孟弢上元人萬曆己卯鄉薦歷瑞州

知府爲政以撫字爲先。不事苛察。嘗曰。吾奉命出守。爲民非爲名也。一夕夢郡有火災。竭誠齋禱。明日闔境共見火星南飛。得免于災。事載去思碑。

何太吳淳之。字仲雅。登萬曆癸未會魁。未殿試。告病歸。同榜進士殷都送以詩云。收來駿骨還歸市。畫就蛾眉不入宮。可謂事切而語工。仲雅登繁臺詩。斜日窺疎雨。歸鴻綴遠天。曉川月瀉空潭水。霞餘幾樹楓。著有足園集。

陳評事舜仁。字淳甫。號敬所。一號訥所。父維瀚。夢祖平岡。授以玉鼎。而公生。穎異不凡。日誦數千言。弱冠餼于庠。屢試前茅。大京兆汪公重其才。命修府志。與盛敏畊。陳桂林。沈朝陽。三高才生共成之。稱爲完書。萬曆己卯。登賢書。癸未成進士。授衢之江山令。父憂居廬。足不越限。服闋。補令太和。倍稱難治。公省訟牘。戢豪暴。謝請託。剔積蠹。均賦役。清保歇。賑饑乏。民皆勒于萃和書院。治邑五年。戴如父母。而上官嘆其侃

直僅量移大理評事。嘆曰：吾不能媚人于邑，安能媚人于朝哉？移病歸里，杜門却掃，絕口不談世事。惟里中疾苦如坊廂舖行夫馬快船之類，則娓娓陳說利害爲民請命，甚力。當事素重公，因得罷免諸弊，閭井更甦焉。博學至老不倦，卒年八十有一。所著有樗亭稿。

王太守堯封，號華岡，先世金壇人，移家金陵。萬曆癸未進士，授戶部郎，出守南昌。以恤民興教，革弊鋤奸爲先，尤加意人才。晉守滁州，州民苦于糧多逃亡，時值編審極意釐剔，減下戶舊額十之六，其他亦減十之三。民乃歸業，精于法律，嘗言：明豈能盡奸，要在執一寔以御百虛，法豈能遍有罪，貴于刑一人而萬人懼。歷政皆以廉能稱。戒子弟曰：吾家世淳樸，勿習于澆世，清貧勿污于利，世讀書勿荒于嬉，人以為名言。有學惠齋摘稿。

焦澹園先生竑，字弱侯，生而端敏，六歲從師，登觀象

臺嘆曰。天濶如此人。乃蔽以垣。撤之則六合爲一矣。稍長好學博覽。耿天臺視學南畿。深加延接。爲高弟。適盱江羅先生來自宛陵。許敬庵管東溟諸賢畢會。互相印可。舉嘉靖甲子鄉薦。困春官者二十餘年。肆力羣書。銳意聖學。萬曆己丑會魁。殿試第一人。除修撰。爲東宮講官。講讀故事。依經解義而已。公講畢。搢揖而進曰。臣等敷陳或有未備。願殿下垂賜明問。東宮稱善。自是每講必從容扣擊。應答如響。是時東宮才十三。聰明日啟。公之功爲多。太倉謂元子冲齡典學。當引以圖史故事。公遂采輯成書。繪圖演義。名曰養正圖解。同官相與側目。喧傳已私進禁中。乃具疏上之。上詳加省覽。溫語批荅。忌者益衆。丁酉北試。上寘原推兩宮坊。而用公原推者。愧恨構新建。合謀以傾公。遂調外屏。居里中。日益淵博。屹爲儒宗。與四方同志者論道無虛日。貫通宗旨。探微抉奧。負笈而至者。仰若山斗。公自以數學相長。老而益勤。所著有澹

園全集續集。筆乘老莊翼。評古珠璣石鼓歌。云天昏
地慘鬼夜哭。至寶欲出風雲埋。六百四字傳青簡。二
千餘年開青苔。辟雍橫陳雜駟驄。摩沙細讀如談諧。
近傳岫嶼碑更偉。青字赤石鉅以魁。宣王雄俊神禹
智。何異鼻祖于雲來。安得移之置一處。挈龍披鳳心
眼。開祈澤寺樹深迷。日月碑額見齊梁。旛影風前靜。
曇花劫外香。梅花水旋自雲根出。還隨泡影消。年深
饒石髮。坐久見魚苗。青桂再逢招隱士。白雲真署醉
鄉侯。共披萍藻知魚計。滿放葫蘆伴鶴遊。子尊生
周並有才名。尊生字茂直。白雲洞詩千林落日稀。人
跡一徑疎。鐘散鹿羣送友語。向韓陵堪片石。跡陳漳
水尚高臺。泛舟秦淮疎雨乍迷。桃葉渡冷風時度。竹
枝歌周癸卯舉人著說。楷行世。季子潤生以廕敘仕
至曲靖知府。殉國難。孫綱戶部主事。
朱宗伯之蕃。字蘭嶠。萬曆乙未殿試第一人。公有兄
生時祖夢一大貴人。衣朱登堂拜之。且云宜受拜。因

而入內其夜兄生後痘危祖坐守偶交曉夢前貴人
辭之云來尚早三兩年方再來徑去其夜兄卒後三
年夢前貴人復來徑入而公生朱仲成觀察談與金陵瑣事異幼卽

穎拔甫數歲日誦千言工楷書法治舉子業援筆立
就奉親極孝既貴悉以遺田讓諸弟天性和易坦直
超然無累在史館時加一品服奉使朝鮮比還盡却
其贈賄鮮人乞書者鱗集或以貂參爲贄盡斥以買
法書名畫古器收藏遂甲于白下辛丑會試同考拔

許獬等十八人皆知名之士人服其鑑衡丁內艱不
復出通籍三十年立朝之日無幾與諸縉紳處閭閻
侃侃是非可否未嘗輕以徇人歸里構三徑永慶寺
傍各小桃園嘯咏自樂和移居詩墻短山爭出庭空
月易留泉香浮茗椀漁唱送蘋洲閣試鴻鴈來賓云
湘江霜月連佗塞北海音書到上林其餘著作多諸
放似嘆似嘲不拘典要或傳公之冊封朝鮮也泊一
島嶼間登眺聞鐘磬聲訪至茅庵巖室扇閉問旁僧

荅曰昔有老衲修持偶見冊封天使過此蓋狀元官
侍郎者聲勢赫奕遂逝此其塔院耳公命啟之几案
經卷塵封苔蝕位置宛如素歷乃豁然大息而返自
此脫蹤世榮放意烟霞人莫窺其趣著有奉使朝鮮
集南還雜著落花詩千從義以廕敘仕至副使

周大令元字長卿萬曆乙未進士自幼以文章雄視
一世宜遠樓詩欄杆千嶂暝砧杵萬家秋過棲霞東
之讀書處六代碑存誰幼婦百年書就恰名山著有

長卿集

長卿之祖相字東臯官欽天監正加順天府丞深通
曆學每言士大夫知曆者趙大洲上不得算盤唐荆
川上得算盤然亦未到頂能到頂者僧一行郭守敬
矣荆川得箬溪顧尚書傳其法東臯爲之印證常云
知曆理又知曆數此吾所以異于儒生知死數又知
活數此吾所以異于曆官著勾股測望論勾股容方
員論弧矢論分法論六分論嘗與公反覆辨難公著

書數大冊。皆言曆法。每言占星。不但知其分野度數而已。其光色星星不同。要須隔紙牕穿隙觀之。一見其光。便知爲某星。百不失一。方可言占候耳。顧太史謂昔人論星所未及。

張封公鏜。先世居北門橋之豆巷。嘗言三十年前有堪輿謂之曰。君宅後之河。自西而東。所謂一彎辛水向東流也。此地當出鼎元。時人以其諸子秀美而文。咸屬望焉。久之。焦澹園先生移居其對門。至己丑大魁天下。其言乃驗。子文暉乙未成進士官。至河東運使。文曜字弦吾。博洽高才。後學仰爲宗匠。翕然從之。顧少宰起元。字鄰初。萬曆戊戌會試第一人。殿試二甲。第三人。清修自尚。望重朝野。由編修累官吏部左侍郎。時座主沈蛟門葉臺山秉政。屢欲引以大拜。公避居遯園。七徵不起。立朝僅五載耳。嫡孫蓋詒。問業于予。見七召亭聯云。林水翳然。便有濠濮間想。清風適至。自謂羲皇上人。門人有巡鹺兩淮者。知公清素。

乃密論鹽商以重貲求其寸札。公堅卻曰：吾不爲也。詩集有名世文章出世心之句。蓋自寓云。公學問淵博。如古今成敗人物臧否。以至諸司掌故。指畫歷然。可據。凡考訂成憲者。皆折衷于公焉。稱述先輩。接引後學。孜孜不倦。林泉自賞。未嘗輕至公庭。惟地方利弊。如兵部快船改馬船。絕衛官之科索。兩縣坊廂。準里甲爲條編。皆更定良法。軍民兩便。或有妄言復舊。以便其私者。公力爭之。乃止。望江樓讌集詩。鴻鴈乍寒。秋後雨。蒹葭初老。露爲霜。山行嶺雲閒。度馬山鳥傲。行人風煙低。白鳥巖壑卷。蒼藤落花采。香徑遠。空殘月。結綺樓高。祗斷雲銷魂。不信香難返。含笑猶疑色可餐。所居遯園。但有古松。恠石。曲徑迴廊。天然逸韻。不假修飾。嘗自題像云。誰爲太虛生。此閃電先生之脫然榮利。蓋有本矣。人猶惜其不及大用云。著說畧。遯園集。雪堂隨筆。客座贅語。寒松齋稿。歸鴻館稿。武陵稿。卒謚文莊。子道昆。以廕敘。戶部檢校。

何太僕棟如字子極號天玉祖汝健父湛之叔淳之
皆以各進士著政績公穎秀異人垂髫鍵戶山寺除
夕家人促歸方研毫苦思不輟年十九補博士弟子
員文名燁燁嘗睥睨慷慨謂大丈夫自有鐘鼎奚但
尋行墨哉甲午舉于鄉登戊戌進士家世貴介兼以
少年高第英氣專決視天下事無難爲者初授襄陽
府推官清方自持平反疑獄時苗衆作亂於板角關
公簡練車徒援枹鼓立軍門薦廢將王一桂竟俘馘
之咸稱公知兵稅璫陳奉貪橫肆虐檄府佐如屬吏
公曰朝廷命官豈中貴人屬耶沉其爪牙于江中璫
開青山礦于東陽公察爲顯陵發脉繪圖上聞事遂
寢上由此知公璫以穀城宜城礦不中額官民被掠
大闕爭執挺起公執其黨羽二十五人坐以劫庫擬
絞以聞後五日璫亦具疏上裂之置不問亡何又激
變省城京師傳言襄官民相比擊殺天子稅使上大
怒首逮公并在事諸官由是罷開礦公繫詔獄四

年從慕岡馮公受書演易甲辰上感星變特釋之辛酉光宗遺詔起南職方司主事履任三日會邊警告急公破產募兩浙壯士六千人誓立奇功壬戌加太僕少卿率所部及京營選鋒萬人出塞危疆賴以少安樞要諸忌者哂之曰其獵封侯賞乎誣以冒餉下鎮撫理兵民環泣呼寃北司千戶許顯純希崔魏指拷掠楚毒公氣絕復蘇仰天太息曰吾三世受國恩分爲國死乃不死行間死圜下乎吾自不愧心不愧君斯已耳久之法司無可抵罪乃稍稍持平坐以募船糜四百金遣滁陽戍戊辰崇禎改元首雪公寃脫籍歸里公倦憂國恤癸酉具疏極言屯鹽錢法兵將諸利弊乙丑又疏留都兵事當亟亟城池河爲重鎮未幾寇氛果蹂鳳泗范大司馬擬推轂爲根本計而公已嬰疾不起矣公起家四十餘年居官不及一考下錦衣獄者至再伏櫪寢牀獻替益力夫固思有所表見非苟焉而已也性落落難合晚年與陳我如楊籲

之友善。潭月嶺梅。觴咏遣懷。所著有初續南音。徂東
草攝園草。恢復議。石城會語。又輯實用編。經武編。文
成外編。近溪要語。行世。四十餘年。守不。及。一。卷。十
卜兵憲。履吉。字中立。號訥齋。性至孝。早年喪母。哀慕
沒齒不忘。登萬曆戊戌進士。授泉州府推官。罰必當
辜。不侮不畏。詳載興讞錄。值中官高某開礦。藉端害
民。發掘廬墓。激變人心。公毅然以身當之。具疏上聞。
收繫其黨五十餘人。璫勢稍戢。公與衆約以千金助
其礦稅。使之出境。士民踴躍樂從事。乃寢捐俸廣置
書院。立義倉。以贍窮民。考天下清官第一。公詩集中
聞鴈云。霜月流孤影。寒雲續斷行。棲霞山云。野鳥啼
晴樹。歸雲鎖翠苔。

疎雨長虹斷。遙山積翠微。風微魚淺戲。泥煖燕先知。

馬山人
光靈

水翻細浪魚銜藻。露滴空堦鶴隱松。寺靜野雲穿石
竇。洞虛飛雨濕莓苔。徐公子邦寧

孤亭全受月。絕巘半沉烟。雲歸一巘白。霜過半山紅。

陳秀才

延之

人烟千嶂裏。客語百花中。劇知情是妄。翻說夢成真。

幽花不碍路。偃木自成橋。宗泐

江山空姓字。樓閣但雲烟。弘恩

帝女巧將霞製錦。仙人長以鵲為橋。城中藝圃甘遺

世。屋裏梯雲好看山。吳山人擴

池上墨花春霧重。閣中佞草錦雲長。花沿石竇晴偏

潤。樹拂涼颺秋正分。長林風細花香煖。古寺雲移月

上初。萬明府夢桂

李卓吾定林菴記曰。定林白下人也。自幼不茹葷血。

又不娶。目隨其主周生赴講。原名周安。予未嘗見周

生。但見周安隨楊道南至京師。時李翰峰先生在京

告余曰。周安知學。子欲學。幸勿下視周安。蓋周安本

隨周生執巾履之任。乃周生不力學。而周安供茶設

饌。時時竊旺。或獨立簷端。或拱身柱側。不欹不倚。不

退不倦卒。致斯道。又曰周安以周生病故。而道南乃東南名士。終歲讀書破寺中。故周安復事道南。夫以一周安。乃得身事道南。又得李先生。嘆羨弱侯信愛。則周安可知矣。後二年。予來金陵。獲接周安。而道南又不幸早死。周安因白弱侯曰。吾欲爲僧。夫吾迄歲山寺。只多此數莖髮。不剃何爲。弱侯無以應。遂約予及管東溟諸公。送周安于雲松禪師處。披剃爲弟子。改法名曰定林。弱侯又于館側別爲菴院。而予復書定林菴三字以匾之。定林不受。徒創菴甫成。卽舍去之。牛首復創大華嚴閣。弱侯碑記其事甚詳。閣甫成。又舍去之。楚訪予于天中山。坐化塔于天中山馬伯時隱此山。特置山居一所。度一僧使守其塔。今定林化去。又十二年。予復來此。弱侯曰。菴存人亡。今不記。恐後此不知定林爲何等人。予謂從來僧之有志行者多矣。獨定林哉。獨怪其不辭卑賤。而有志于聖賢大道也。故曰賤莫賤于不聞道。定林自視其身爲何。

如者故衆人卑之。以爲賤而定林不知也。今天下冠冕之士儼然登講帷。口談仁義。手揮麈尾。可謂尊且貴矣。而能自貴者誰歟。况其隨從于講次之末者歟。又况于僕厮之賤。鞭箠之輩。不以爲我勞。則必以爲無益于充囊飽腹。且相率攘袂而竊笑矣。肯俛首下心。歸禮窮士。日倚簷楹。欣樂而忘其身之賤。必欲爲聖人然後已者耶。古無有矣。嗚呼。道不虛談。學務實效。則此定林菴真不虛矣。

張正蒙字子明。世居通濟門外之魯灣。臨河結廬柴門。晝閉帶索。拾穗未嘗俯仰于人。年踰九十。隱淪終老。臺城詩。佗武湖秋鴻。鴈下華林園。冷露霜凝空山僧寺。三更磬隔岸人家。夜半燈溪閣坐雨云。隔簾風挾雨。虛閣晚生秋。墻東別業云。落花春雨巷垂柳。暮烟村小築云。地偏雲拂樹。院靜鳥窺簾。答山人過訪不值云。看山出郭遠。帶月入門遲。

杜山人大成字允修。幼嗜音律。工繪事。掃除一室焚

香酌醴自號山狂生。盛仲交言其祖安道以櫛工侍
孝陵官至太常卿。與蔣恭靖陳秋碧史臥癡皆世居
冶城之麓。二百餘年。允修咏柳水邊膩。欲堆金縷花
外輕。堪度玉梭。著有晞真集。

方登字嘯門。慕孫登之爲人。故以爲名。及字愛冶城。
林木幽邃。卽其麓家焉。自號樵城子。書畫詩文自適。
一生不見貴人。嘯門詩有水落痕猶綠。雲開山更明。
詩成一葉落。酒醒孤雲飛。移花紅雨墮。洗竹翠雲新。

山雲茶屋煖。海月竹牕虛。鳥衝帆外雨。船響夜分潮。
法堂雙樹古。禪榻半林閒。皆饒韻致。著有半蒼軒稿。
陳叅將忠。號南塘。府軍衛軍家。貧有膽智。能于江面。
浮游百里。補役新江口。操高都督。新任嚴刻。每誇家。
丁拳勇。營將預選。忠等比藝及演武。忠連踣其三人。
都督短氣。苛求其小過。捆打一百。鎖之營中。詰問曰。
陳忠好武藝。今日如何。意在致之死也。入夜。扭斷鐵
索。歸家。送祖母于叔。送妻于岳家。半夜。泗大江。逃命。

于淮陽開府李公麾下。李公江右人。偶宿廟灣。關王廟忠宿于三里外。方就枕。忽夢幞頭牙笏一神將。笏上寫一火字。仍指其去路。驚醒。漏下二鼓。呼起兵衆。巡至關王廟。見倭奴廟前放火。兵少不敢戰。乃從廟旁拆牆救出李公。卽傳四路兵蜂擁而至。夜殺真倭首級七十二顆。李公大喜。始重用忠。又于牛王河與倭大戰。忽羣倭奇兵襲其後。忠曰事急矣。乃負李公渡河。公感之。結爲義子。兩家各畫渡河圖以紀其事。

曾在胡總制幕下。一日對陣。見倭寇躍武挑戰。梅林曰得一猛將衝之以挫其鋒可也。忠毅然願往。梅林卽以所乘馬與之。人雄馬壯。白袍雙刀。舞入倭陣。如無人焉。賊皆辟易。乃緩緩策馬歸。梅林大喜。揮兵繼進。遂獲全勝。是時承平日久。人不知兵。聞警望風披靡。公獨敢勇爭先。戰氣百倍。不階尺寸。屢建奇功。由卒伍歷官叅將。又于通州逐三倭。一鎗錠一倭奴于墻。兩倭懼其勇猛。不敢救而去。又于神烈山擒兩虎。

威名大著。凡與倭寇百戰。未嘗少挫。三軍咸敬服之。嘗以公事盡携健兒出。大盜四五十人。斬門而入。將逼其臥樓。夫人沈氏持一鐵鎗守樓門。衆不敢登。但噴噴曰。鎗法甚緊。盜不得意。縱火焚樓。沈氏見火逼身。從後牕挾鎗躍鄰屋。脊免于難。

胡宗仁字彭舉。隱冶城山下。生而偉狀美髯。晚年衲衣拄杖。反手徐步。鬚髯從風飄颺。見者目爲仙人。喜譚論工畫。本富家子。老而食貧。不謁時貴。嘗咏唐六

如詩閒來。自寫青山賣。不使人間作業錢。殊自得也。有詩二千餘首。鍾伯敬訂梓行世。花落竹堂靜。烟消石屋空。殘月半牕白。寒星徹夜疎。不眠增晝短。延漏惜冬餘。玉笛梅花夜。銀牀梧葉秋。一水帶寒月。孤村幕夕烟。貧惟尊酒在。詩豈衆人傳。僻居心遠矣。明月爲我至。渚雲乍去猶。拖水山月初。生不過過林。老樹穿雲出。重樓夾水開。石空中作屋。巖斷上通橋。徑側倒懸樹。岩穿中度人。人從淺水過。路向半山通。岸楓紅

隱寺湖水碧連山。皆詩中畫也。嘗自贊寒星明月之句入神。有知載齋稿。

周暉字吉甫。博古洽聞。爲鄉里所重。焦弱侯稱其胸饒韞蓄。性好編錄。凡格不虛。巾箱恒滿。吟咏自適。不求人知。年八十餘。著金陵舊事六卷。瑣事六卷。又續集再續剩錄傳世。移居詩溪。聲數番雨。鶴夢幾重雲。綠尊堪累月。青鏡不藏年。鶯啼催小飲。鶴步伴閒行。雲歛山光瘦。風攢落葉深。過頭九節杖。信手七絃琴。寂寞徒供笑。烟霞不受嗔。聞道晚知淺。結交貧覺深。半酣疑有得。多病掩無能。嘯月野情淡。眠雲春夢寒。嘗以所著山中白雲一卷。寄顧太初。多見道之言。如云。向平謂富不如貧。貴不如賤。此語尚有計較。未能脫然于富貴貧賤之外。又云。清事不可着跡。若器用必求精良。飲食必求異巧。乃清中之濁也。世事惟偶然者最佳。太初嘆許之。謂自盛仲交之後。推吉甫爲隱士之杰矣。嘗愛余村玉皇觀壁間松菴二隸字。大

德間狀无王龍澤所書也。萬松菴王問書。

吉甫續記先達遺事。可補見聞所未備。附載于此。
張侍郎文昱。上元人。洪武五年。知邵武府。廉介愛民。
善詩文。尤精于畫。號蒲塘散人。以清望陞刑部侍郎。
鄉先生朱孔陽。洪武時。以楷書名。榜書更妙。大報恩
寺額。先生所書也。弟銓。學其筆法。永樂初。選入詞林。
邑人有爲都吏者。素謹飭。尚義。臨事不苟。成祖殺方
孝孺。令人食其肉。食肉一臠。賞銀一兩。吏之僕。食肉
得銀。歸家。述其事。吏聞之。憤怒。大喝其僕。激裂腦出。
而死。聞之。顧孝直云。惜失其名。

正學先生。備受慘刑。門人廖鏞。廖銘。詐爲乞丐。糞衣。
乃得近尸場。乘間拾其剩骨。葬之。不封。不樹。莫可認
識。今立方祠于永寧寺後。又聚土爲塚。未必卽原葬
處也。

李太史懋。宣德初年。上懷金錢。至史館。擲于地。縱諸
臣拾取。公獨正立。上呼使前。以袖中餘錢。皆賜之。

或傳公諸生時。因觀燈。拾一金釵。卽書其門。落金釵者。驗取。越數日。有婦人造焉。卽還之。後其夫具幣往謝。公笑曰。吾今索謝。當不歸汝。卻之。列傳公以字行

尹從龍。弘正間。寓金陵上浮橋江東廟。能出陽神。分身數處。赴齋。成國朱公事之甚虔。問曰。欲一見呂祖。可乎。荅曰。可。公于朔日出水西門。劉公廟拈香。當請一會。及期。寂無所見。歸詰之。從龍曰。公會見道人醉枕酒瓶臥路者乎。公曰。見之。曰。道人枕瓶。兩口相對。分明呂字也。公自不悟耳。公乃遣人四路覓之。皆云。適去片時矣。一貴人女弱症。諸藥不救。母鍾愛。不能捨。邀從龍視之。曰。有癆蟲。尚可醫。請用何藥。曰。藥力不能治。但共宿一夜。卽愈。母信之。白于父。父大怒曰。豈有公侯家女。與一風道士同宿之理。後見女姝無生意。母又涕泣言之。懇切。不得已。從之。令紙糊一小室。不露隙。設榻去帳。用手摩足。心如火。抵女而寢。戒女云。喉中有蟲出。可急白我。女不能寐。而尹鼻息如。

雷天將明。女報蟲從口中飛出。從龍起。四顧不見蟲。形曰不能除根。仍害一人也。蓋乳母念女。因開一孔。窺之。蟲出女口。已入乳母腹。及曉。父母視女顏色頓異。大笑而去。後數月。女方擇婿。而乳母已死矣。上新河有娶婦者。令出拜之。意在祈福仙長也。從龍一見新婦。急抱啣其頸。舅姑大駭。力解之。曰風道人不知敬重。何故啣我新婦。尹嘆曰。可恨。只啣斷兩股。奈何。聞者皆不解。後與其夫相諍。遂自縊。三股繩僅有一股未斷。竟縊死。始服其奇。或稱爲尹山人云。其度牒乃宋理宗年號。又元世祖給一牒。綴以羊皮。皆存。武布政尚耕。號晴川。潔已奉公。重其品者。虛九卿之位。以待之。官止湖廣布政。晴川歷歷漢陽樹。乃罷官之地也。取號晴川。時已前定矣。邵副使鏞。字伯倫。羽林右衛人。正德戊辰進士。聰慧天成。爲文落筆超絕。不煩構思。年十九。聯捷春官。以府試得雋。未嘗揖督學也。司馬西虹曰。伯倫自幼風

神秀整有異質爲戶部郎出知雲南府擢四川副使
所至有聲性伉直不阿以是罷歸放情泉石不屑生
殖以拓業雅尚曠達焉

徐秀才九功兄九經九疇正德癸酉同登九功遂取
廚書盡焚之曰留有餘與後人一日赴飲夜歸月明
路僻見南河中突出一女子姿容異常同行數里許
九功家上浮橋南岸叩門而入登樓玩月女忽從牕
入求合九功疑爲妖物嚴拒之女取筆書几云吾非
妖乃與君有緣耳後日魯橋相會復從牕中去及兄
九疇選鄒平知縣九功送母就養路經魯橋值流賊
阻路暫僦民居忽沂州兵備顧英玉過乃九功社友
又兩兄同年也入拜其母主人乃一民兵點禦流賊
已悞三卯英玉令嚴一卯定責四十主人自分有死
而已哀求徐母救之獲免願以閨女酬活命恩九功
見女之貌乃昔于南門所遇者魯橋地名又與前言
合堅不肯受而去後英玉作九功傳有遇女不亂之

語指此。

王南淮繼文。素行忠信不欺。有洪姓者。貸其五百金。三年始償而暴卒。其弟與子不知也。仍托友求緩期。公曰。還我久矣。洪之合族皆感其德。所交游稱貸甚多。前後不下萬餘金。度不能償者。悉取券焚之。嘗市絲武林。邑人聚觀之。公驚問故。皆曰。聞王君帝都忠信人。願識其面耳。子元字孟起。著有孟起正續詩。

李鶴塘景星。字應德。一字天祥。幼肫肫有至性。二親喪。三日不飲食。葬祭如禮。友于二兄歿。能字其孤。與人交。能急人之難。不計小怨。見牧民者。政事非彝。思得一邑自效。嘉靖元年。貢入太學。卒。陳玉泉贊之曰。孝友庸行。民鮮能舉。愛敬無譽。君子斯與。時若古訓。靜言靡遺。志悠運促。未普厥施。

蔣孝廉繼蕃。字巽之。上元人。舉正德己卯賢書。性至孝。屢不利于禮闈。戊子北上。抵淮。忽心動。亟歸。則母已病篤。一見而逝。人以爲孝感云。西虹曰。巽之爲人。

貞潔剛直。勵志節。騰駿聲。讀書務析微。意不肯草草。臨文潛心構思。句不驚人。不止文行兼美之士也。宰孝子應文。江寧人。家貧。九歲喪父。後數年母亦喪。寥寥餬口。念父母。不置。刻木肖二親像。冬夏更衣。衣之晨夕。進食出入。必稟命。沈宗伯姚京兆劉太尹皆謂其事死如生。旌表之。

顧太史言陳中丞金陵人物志載孝子之割肝割心者七人。近世則徐佛保江陰衛人。黃阿回水軍左衛人。皆割肝以療母。

徐秀才應坤字順之。江寧人。善讀書。記輒不忘。涵蓄經史。有扣必應。無間隱僻。人目爲書廚。久困場屋。棄去。構亭青溪之上。種竹百竿。詩酒放達。號竹溪散人。西虹稱其篤厚不伐。尤切友誼。

報恩憨山和尚德清道。價重于天下。直指某公訪之。因問歌利王割肉。不知痛不痛。山曰。孔夫子絕糧。不知饑不饑。直指欣然服之。

李高士素居家極貧。父精課命，積錢十千爲之議婚。素居跪白曰：兒久欲學仙，緣父母在堂，若欲議親，徒誤人女子，兒便離膝下入山矣。父母不能強，竟終身不近女色。攻舉子業，胸有夙慧，往往不遵朱註，坐是失意于有司，棄而學醫。醫未成，得風寒病，不能動履，乃習內養之功而効，更強健于未病時。賣藥度日，貧者輒施之，積三十年，冬夏一棕笠，一青布衣。嘗曰：人生皆爲饑寒所困耳。吾已打過寒字，再遲二年絕粒。

則逍遙世外矣。居無屢屨，牀無枕席，竈無薪米，僅一藥爐相伴。或扣以道德經，聖人不死，大盜不止。荅曰：聖人入水不濡，入火不焚，決是長生不死。死者凡夫也。聖人盜天地之元氣，日月之精華，大盜也。孰能止之。可止者鼠竊狗偷之人耳。如此則斗與衡皆無所用。剖之析之可也。而民又何爭之有。聞者解頤。盛仲交雜憶十詩，取景之幽邃，遠俗者祈澤寺龍泉，天寧寺流水，玉皇觀松林，龍泉菴石壁，雲居寺古松。

朝真觀檜徑。宮氏泉。大竹。虎洞。菴。奇石。天印山。龍池。
東山寺。薔薇十景。皆衆人所忽。錄之以備遊觀。
城內各園。顧鄰初。少宰杏村。鳳臺園。張孚之。運使佚
園。王太守爾祝園。徐公子西園。吳孔璋園。何公露大
參園。卜味齋園。許長卿園。姚元白鴻臚市隱園。朱蘭
嶠宗伯小桃源。湯熙臺園。陸文學園。方子中園。張保
御園。李氏小園。武文學園。顧羽王鴻臚園。顧周南園。
顧太復新園。

汪指揮應乾。號懷岡。府軍右衛世職。事親能孝。母病
危。醫藥無効。割股煎湯以進。遂愈。數年後。母復病如
前。又割股以進。又復愈。屯田方侍御。極重之。表其門。
邢有都。太史雉山公之猶子。不屑舉子業。好讀奇書。
一見郭忠恕佩觿。遂熟記其序。楚辭皆能背誦。兼考
音韻通切字法。尤喜星曆算數。不由師傳。獨契其解。
因自治漆毬爲渾天儀。及布算諸法。質之精于星曆
者。皆毫髮無差。偶登友人姚允吉樓。望長干浮圖。曰

此影可射而入也。遂閉牕戶，塗塞諸竅，止留一隙，斜對日光塔影，果宛然入焉。亦異人也。

蔡宜山有邵賸詩補錄，令通許七年，入覲僅餘俸金

四兩于橐中。邑人慮其空乏，醵四十金要于路賸之。

公固辭吟一詩云：不愛人間不義錢，居官七載橐蕭

然。許人若解中郎意，下有蒼生上有天。以上二十二則

朱武庫環字德佩，上元人。弘治乙丑進士，少英敏，善

屬文，爲兵部武庫司郎中，曉暢軍事，才名甚著，遭謗

落職躬耕秣陵之野，日讀汜勝書，有得乃治田，獲倍

老農弗如也。戲觀坐隱，忽悟棋社中亦推第一。

何勳伯不但以政績著，鑑衡亦過人。自幼天資敏慧，

爲文新奇，有法學人師之性，剛直不諧于俗，爲御史

按兩浙，適值柄文甄收，名士爲多。兩浙至今謳思出

守荊州，再移常德，士民翕然稱賢，惟不當監司，意免

歸，勵諸子以耕讀，不數年力田者穰穰，力學者彬彬。

始放情泉石，以樂餘年焉。

沈德化恩字復之江寧人少負文名正德己卯鄉薦授深州學正啟迪不倦深人德之遷德化令性寬簡不善事上官罷歸貧窶意甚晏如嘗笑曰只知爲士貧不知官後更解貧耳輿論貴其品

王孝廉堂字時升上元人文通之孫幼有聲京庠爲文簡淡高潔都人士多宗法焉舉正德己卯鄉薦性剛直嫉俗于人恒落落庚辰下第卒父北山翁已耄妻艾無子人咸惜之

吳昌邑惠字仁甫江寧人德性溫雅博學能文者宿每稱爲遠到之器正德己卯舉鄉薦出宰東邑留心民務邑人戴德以清直忤巨室蒙謗無以自明又凡事掣肘不能行遂憂憤卒卒之日士民哭送者千餘人

以上五則皆五同傳

魏考叔之璜少孤貧初不知書因傭書通曉文意遂能詩以丹青餬口一部郎賞其筆意始知名然杜門匿影日事盤礴天性孝友養老親撫諸弟皆取給于

十指不肯干。人公卿過訪。不一報謝。惟招之飲酒。則往。清言獻酬。坐無考叔不樂也。以老壽終。問朗公病。短榻延朝夕。孤燈伴死生。贈友載見一回老。相逢各盡歡。

天界僧果斌。同諸官長遊牛首云。官閒何待隱。僧老欲忘禪。鳥棲雲外樹。龍護鉢中蓮。

楊伯海誦一鄉先生咏枯木云。有枝撐曉月。無葉響秋風。不記爲何人之作。

高千戶仲光。世籍豹韜衛大司馬。命往北賚奏。行至山東界野店中。有遺金一囊。約三百餘兩。問主人早有何客寓此。荅以遠客二人。行且五六十里矣。公自思。若匿此遺金。人雖不知。鬼神知之。我四十無子。不受此非義之財。以損人也。遂解鞍秣馬。以待次。早有客尋至。且泣且訴。公取而還之。客問姓名而別。後生四子。萬曆辛丑武進士。高居仁。卽其長子也。卞同知有徵。號虬岩。萬曆庚子鄉薦。謁選平度州昌

邑令歷任六年。水蘖自矢。值水旱流離。公倡先賑濟。多設粥廠。冬施絮襖。窮民賴以全活者數十萬人。以循良課最。考天下清官第一。行取入京。吏科祁梧垣疏言。吾鄉連年災傷。賴卜某多方救濟。一旦內轉。東民如失慈母。乞就近陞遷。得旨下部議。陞本府同知管州事。東民踊躍歡呼。公勞心撫字成病。恍惚見迎赴新任者。公許以六月三日。至期黎明。合邑見公。采服黃蓋入城。隍廟中公已卒。官署矣。百姓肖像以祀。據佚記。秦元之名從龍。太祖至金陵。居王綵帛家。聘與同處。訪時事。稱先生不名。故能薦陳中行。被知遇。王公浚。金公潤。高年友善。靜虛子紳。陞南少司寇。首謁王公。公延之上座。司寇不辭。公不悅。移書靜虛。靜虛切責司寇曰。吾止此老友。以爾傲慢致疎。絕復書謝之。王公不納。靜虛率司寇往謝。三返始得見。劉公璽。旣著廉明。更饒名理。分閩江右時。直指視學。諸生講白。亦可蹈。巡方問若鄉誰能之。生對以文天

祥公曰。奈何以專聶之行。加諸仁至義盡之賢乎。且仁至義盡之外。豈更有所謂中庸耶。聞者嘆服。

道南夜坐搔癢口號。手本無心癢便爬。爬時輕重幾

時差。若還不癢須停手。此際何勞分付他。弱侯和云。

學道如同癢處爬。斯言猶自隔塵沙。須知癢處無非

道。只要爬時悟法華。雲谷曰。二公不是門外漢。

王雱東絕句云。清如浴碧閱人眼。肅若澄秋律已心。

何事難隨時調入。自修音韻一。張琴。以上五則俱據佚補載于此

撫按具題立主于萊州名宦。此十一字。未據上下同知。係百姓所傳。下萊州。亦是萊州。

鄭學諭宗化。字尚德。號明臺。以明經教諭滁陽。延集

多士。置講席。四時不輟。有鄭夫子之號。性至孝。居異

母喪。終制未嘗見齒。都人士稱述之。同學顧太史鄰

初贈公詩云。有客盡從黃憲語。諸兒時授服虔書。又

云。神鋒我愧稽中散。名理君過郭子玄。可想其風槩

云。子元厚。字載之。博雅方正。有父風。曾遇異人授以

道術。由是精于導引內視之學。病者求其搬運撫摩。

法簡功倍。醫藥可省。已亥予感胃膈之患。不食不寢者百餘日。延先生治之。立愈。人益神之。其言人身臟腑。開會之處。皆可指而數也。審察病源。振舉其竅要。施功膚骼之間。透切膏肓之隱。所以易爲挽救。凡猶緒餘耳。其秘多不傳。近惟常然上人得其要領焉。

姚副使履素。號允初。上元人。萬曆辛丑進士。授刑部主事。恤刑湖廣。多所全活。差竣于漕河道。中舉一子。乏乳。鄰舶有婦。聞而代乳。卽楚囚之蒙釋者也。人以

爲陰德巧。值陞廣東副憲。兼督學政。爲海忠介公申請。廕子平抱繇。羅峒黎賊事畢。乞休。優游林下。葺市隱園居焉。隻字不入公門。獨以民役苦繁。與丁清惠公商。推立房號。得僱役。遂定爲三則。民以樂業。居家儉樸。詩情酒政。一時推勝。著有適楚紀勝。市隱園詩文。征黎始末。

俞少卿彥。字仲茅。號容自。曾祖表。冒姓李氏。母禱茅山而生。公年十二。補京兆弟子員。屢試第一。萬曆庚

子鄉薦辛丑舉進士疏復姓每以不逮養父爲恨奉
母承歡陳情終養母病躬視湯藥坐臥靡寧及歿哀
痛屢絕三年之內承母志捐金與胡正菴施棺鷺峰
寺所瘞蓋萬計乙卯起復選北樞主政巡視皇城衆
軍衛十二年未給口糧移文計部一夕給之歡聲振
地進副郎陞光祿少卿嫉之者以計典謫夷陵守公
清蠹鋤惡雪理冤獄士民愛其判案勒石題曰冰壺
淦翰鄰郡有以細事來越訴者公慰解之曰某非真
訟以慕使君清惠欲識儀表耳是歲有麥秀兩岐之
異徵君王開陽作歌繪圖以贈壬申擢南樞州之老
幼悲泣攀轅舟行數日始去呂大司馬疏請兵部開
鑄以助軍需旨下四司無應者遂專委公乃變產三
千金採買銅鉛公而忘私人益妬之又中以京察罷
園居蕭然讀書自樂所著有四書疑治篇印藪古樂
府歐俞合刻公長才玩世談笑風生感憤時事每擬
樂府以寓憂天憫俗之志丙辰北上賣兒謠長者子

與我糜盈數升。携兒歸。兒別母。抱兒啼。出門去。牽父衣。母先絕。父斯須。死亦不惡。君不見。官府催租。烈于火。今年不死。饑明年催租。來殺我。戰雒南。一餓十千數。已多。餓多。賊多。君奈何。莫學中都窮。罪弁借人頭。顛說征戰。莫學南州猛使君。掩人勞。勦誇功。勦驅民。爲賊何太易。千尺流丸下。便地驅賊。爲民何太難。雨落上天泉。歸山臨終書一絕云。秋月正中看盡夜。野雲散去落何山。擲筆而逝。

程大學士國祥字仲若。號我旋。起家寒素。幼有文譽。年十八。受知于焦太史。欲以女妻之。公辭婚。太史益重之。令受業于門。登萬曆甲辰進士。授確山令。調光山。政惠刑清。民間有半升之謠。謂訟獄簡易。無擾計。所費不過半升粟也。庚午擢南吏部主事。以終養請告。服闋。補祠部。冢宰趙南星宗伯林堯俞特疏薦之。遷稽勲司主事。劾御史請囑者。以肅銓政。五疏告歸。已巳臺省交薦。起考功司郎中。掌計典。矢公矢慎。爲

羣小所嫉。上知其持正。有清望素著之旨。立黜言者。
自大理丞遷太常通政。工部右侍郎。改南戶部左侍
郎。總督倉場。一清夙弊。解官無守納之艱。運丁無留。
難之費。至今誦之。戊寅晉禮部尚書。以重望超拜東
閣大學士。剛直不阿。惟以憂國奉公爲急。與時寡諧。
已卯夏。議兵餉忤旨。乞骸骨歸。復抗疏力諫。隨嘔血。
不藥。每嘆未能終報君恩。仲秋下旬卒。有詩集藏于
家。咏靈谷深松。泉飛玉乳。窺羣鹿塔。湧珠梯。鎮獨龍。
三宿巖衣垂薜荔。烟如醉。字剝龍蛇。蘚欲鑿。獻花巖。
層堞雲中含水碧。數峰江上插空青。二台洞。圓蒼氣。
益龍蛇窟。虛壁光。掣日月壺。周處臺。三井夜。遙懷鼓。
角。百花日。近接溪山。莫愁湖。倒影樹。懸方丈。鏡洗雲。
花。綴太清圖。衡陽寺。林開梵唄。香晨擁樹。掛天衣。烟。
暮。縫鳥影。墜蘿眠。白月。猿聲依磬下。青松。白下橋。九。
微浪吐。緇龍火。十里花。迎白鷺。湖桐覆銀牀。輕雨度。
菱。寒珠腕。落霞招公。天性真摯。難進易退。雖晉位卿。

相淡素不異諸生時衣布蔬食其貧不苟出入里門
常步行一蒼頭自隨而已身歿後其家至不能舉火
值國事孔棘贈卹之典皆未及頒子震初有才望營
塋甫畢感疾卒無嗣以外孫邁英繼

余集生先生大成生有異徵太夫人感香光之祥光
中現僧伽像而誕焉祖大司成伯祥公乃外孫也立
以爲嗣夙慧超羣發司成中秘書讀之咄咄吐奇畧
年胸羅今古不屑經生言因困童子試者十餘載時

年二十有四矣未嘗以家世通于有司乃有司亦不
以遺佳公子爲怪癸卯陶石簣先生主南闈甫入簾
公望見詫曰陶公默若誦憶乎有知者荅曰叅一歸
何處耳聞之頓省出世因丙午丁未聯捷以司成年
高願改南樞奉色養未幾司成沒服闋主武選以文
望典壬子滇試稱得士錄程傳世爭相誦法焉丁巳
丁祖母憂服闋再補前職庚申歷車駕辛酉歷職方
時邊烽告急六易職方不得人公獨毅然分宵旰憂

杜私門簡謀勇。庚癸不呼。壁壘改色。以忤執政請告歸。乙丑特旨再起。值魏璫肆虐。義不辭難。繳躡陞之。詔破僞俘之。奸閹禍不測。加以觸怒政府。削籍。魏璫恨不置。密遣邏卒尾歸舟。公與同行者結不語。期八十餘日。帆影靜泛。聞無人聲。乃免于難。歸卽杜門。謝客。受菩薩戒。愛妾五人。同日遣之。志在禪悅。絕意仕進。戊辰崇禎改元。特旨加璽卿。仍任職方。力辭不獲。甫一月。以塘報一字之誤。落級。已而知公無罪。擢太僕寺卿。掌職方事。綜理邊務。申嚴防禦。皆豫疏報可。未幾。警薄都城。上怒。逮繫大司馬。機務獨倚。辦于公。每一夕。中使數十輩傳宣。公冠帶受事。不假寐者百餘日。條疏計畫。悉當上意。解嚴敘功。辭不受。循例謝職。方回太僕。前後二十餘載。凡四任職方。備歷艱危。名高忌起。獨以孤忠見諒于上。常有朕心憶之。不忘之論。中官傳旨。每稱余道人而不名。或有毀之者。上曰。朕知余道人。日消三文錢豆腐耳。御批清執二字。

褒美之。遷太常寺卿。值東省嘯苻。廷推公撫之。甫下車。招降渠魁。宋尚營等。部署既定。單騎開諭。悉解散。之上嘉其功。有推誠馴暴。具見識力之旨。齊東不逞。借叢豪勢。莫之敢撓。公鋤強恤弱。不辭任怨。值登撫所轄兵變。公已抱疴。請告。聞變。卽調集飛騎。追賊于九百里之外。時登撫孫元化。力主撫議。又素不設備。遂致內潰。陷登素嫉公者。紛紛修隙。遂與登撫並逮。然直道在人。若胡大司寇之爰書。馮給事之申救。固

已昭雪論定。上旣知非公之罪。暨甲戌。山東督撫朱公露布首敘公辦賊功。謂當日緩逮數旬。則賊悉鯨鯢矣。蒙赦。謫戍電白。電白。故龍湫也。沂曹溪。修六祖遺蹟。巨卿名士。多負笈從遊。庚辰。追敘甘肅功。除伍歸籍。不入里門。寓武陵橫山結茆。論道大京兆。張二無諸公迎歸。構竹西書院于馴象門外。日與同志究聖賢微旨。時四方才俊。就正者屢滿戶外。公秉鑑超方。惟收神駿。至時尚雕蟲棄如掃箒。莫不心折而遵

路焉。間以制菽及經濟時宜。嚴立課程。夜則函丈曲
房。燈火星映。或值風雪。掩關人穿松徑。研斲梅水。含
毫苦吟者。相賡緝御。供饋者忘倦。雖寒漏旣徹。公方
秉燭危坐。較其高下。多方誨勵之。冀于讀書種子中。
拔向上之姿。以追前喆。云。值歲歉。捐賑存活無算。壬
午春。力疾討論不輟。仲夏病劇。與高僧叩荅佛法。以
自娛。無一言及家事。十七日正午坐逝。公潔清好道。
蟬脫世資。暑月霜氣。莫干以私。然天性慈諒。喜接勝

友。汲引後進。至忘寢食。鄉先生之惇古誼。愛人才不
惜心血。以牖來學者。先生一人而已。丙寅。敦請博山
艤禪師于天界。大振宗風。入室諮承。燈衣有在。裴聞
喜之于黃蘗。楊大年之于慈明。其匹休歟。遊戲翰墨。
多以夢名。如龍湫殘夢。雜夢。蟄夢。腐夢之類。其所唱
酬。時賢奉爲宗鏡。不在羣言之列也。杯峰孤峰玉立。
雙眸展。收盡支那四百州。菩提樹。卽今不向枝頭覓。
早已拖泥去洗泥。瀝湖若問離鈎三寸意。一聲短笛

白蘋灣。次西華韻。拜婆年節。借婆裙。深入爐湯。好避
焚寒暑。兩頭都不到。可中一句許。誰聞山居有戲以
牙牌集字者。公隨手爲探釣。百二咏云。心如古井波
生月。魔外何妨亂五乘。半跏入夜牕。生白早雲出。門
石屋閒。頻向鄰人賒遠樹。赤憎風掃雜花天。又云。石
鼎寒炊綠雨霏。笋根帶起鑊頭薇。大家不肯嘗些子。
坐飯籬邊苦忍饑。擘碎形山得古廬。山人只合此中
居。此中歲月寬如許。坐睡橫眠也不虛。山好水好萬

事死。拾得楫。拙炊甜水。門闌且喜無殘客。松根况坐
喫茶僧。至其拈古述偈。氣壓諸方。如舍多持鑑頌云。
鑑鑑。饒君打破來相見。早隔一重羅。殼面另有集行
世禪林敬憚之子。二聞以明經知襄城縣。有廉能名。
冷菴題鳳凰臺。松吟當午日。風送欲歸雲。凌官球雪
夜談莊。翳消身外影。冰釋夢中疑。冷韻梅花見。佻情
酒盞知。和張弦吾先生看梅。橫扶軟玉棲芳徑。暖醞
凝脂散曲臺。有感行行春盡徧。蘼蕪惆悵齊梁舊日

都一自鉛華銷歇後。淡烟疎雨莫愁湖。

沈鳳岡朝陽韓峰之子。素性雅飭。以經學名家。焦太史稱其自結髮以來。無一發言舉趾之失。事父母友兄弟。于古之六行。殆兼其實。而不居其名。經明行修之君子也。公嘗采宋元史爲紀事本末。以補袁機仲之所未備。上下千古。遂爲完書。直指黃雲蛟謂其切于世用。梓其書而行之。唐總憲存憶刻紀事前編。李封公雲鵠號濱溪。幼喪父母。依叔竹鎮。有客遺三十金于屋隅。公候其人還之。旣而叔嬖以爲駭。逐之于外。僦居白下。貧無所資。一日于石橋東街遇徽商某。執其手曰。若非還金孺子乎。何憊也。予之十金俾貿易。會村媪憐其素行。亦以羣鷺畀之。經營日久。漸溫飽。輒事施濟。有欠糧者。負七歲幼女將鬻之。公聞其啼立償。所負俾完。聚焉。蘇人張氏兄弟客死。爲之買地塋其露棺。同里耆老嚆西溪年九十餘。臨終囑其子曰。吾不爲衣食所累。延至今日。皆濱溪翁月餽。

米肉錢帛以贍餘生也。我若不言，竟無知者。于是咸服公隱德。公未老，卽委家政于諸子，取親友借券計二千餘金，謂諸子曰：「吾生平慕義，若留此，恐滋汝輩訟端也。」盡焚于庭。卒年八十有七，以孫敬贈刑部右侍郎。

丁醫訓毅，字德剛，江浦籍。時居白下，少喜讀書，于石洞尤精醫業。嘗獲遺金，詢其人，還之。任醫訓科，率夫役採蘆，時有猛虎，公爲文禱神，以身率先，虎引去。後取署本府正科，攝縣篆，屢委勘事，不受私謁。廉慎勤敏，爲時所推。嘗路逢殯者，其棺下流血，公熟視之，曰：「此生人血也。止昇者欲啟之，喪家不之信。」公隨之，至墓所，強使啟棺，乃孕婦也。公診良久，以鍼刺其胸，兒已產矣。母亦旋甦。蓋兒手執母心，氣踣身僵耳。鍼貫兒掌心，兒驚痛開掌，始分娩。通邑稱神。著有醫方集，宜玉函集，蘭閣秘方，傳世。崇祀鄉賢。孫明登，萬曆丙辰進士，仕至衢州知府，築園烏龍潭旁，極其幽勝。尚

祥著書有蓮漏清音。古今長者錄。曰有篇春氣錄。陰
德登科錄。戒牛書。益編。决科要語。檀編。箭商。妙在轉。
慈燃。故鄉消息。趙清獻公淑清錄。雪鴻集。蘇意方安。
老書知源錄。蓉灣雜著諸集。蓮侶公之子雄飛。更嗜
古樂善。做袁了凡故事。聯社勸行功。過格。每朔望率
諸友白之文昌祠。以交做焉。積書數萬卷。每出必擔。
篋囊載圖史。以歸。所著述倍多。有尊儒帖。先聖靈異
錄。蒲團菴生意。霜舫日札。江湄舊話。琴鶴鄉剡史。祀
竈通考。燧人遺意。繪瘻小言。輿史詩刪。小喜。酣半吟。
珠泉志。烏龍潭志。清涼山志。湖孰志。蘭書。蕉史。櫻桃
薈。嶰譜。古今賢妾傳。古今義僕傳。矜情錄。旦氣宗旨。
佩筆遊。雪潭夜集。鷗園借紀。二泉志。心太平菴行持
冊。倦眉居士日策。計九十八種。詳載焚研述。又所積
五車之富。有古今書目十卷。
謝新寧杞。字君含。山寧人。萬曆辛酉舉人。就教元城。
陞廣西新寧令。有循廉聲。祖應午嘗督學粵西。稱得

士公至縣。諸生欽其名。喬執經問業。無虛日。公和易近人。不事催科。賦額先辦。署隆安篆。却例金以抵欠。餉民困以甦。去官之日。士民攀轅。醵金助行李。公一無所受。邑人立祠祀之。公詩集藏于家。山居入座。烟雲偏近水。依人雞犬不驚。漁谿山積雪。徑合樵蘇斷。岩封虎豹潛。

錢封公自強。字仁郊。天性樸厚。寡言笑。鄉黨稱爲長者。有村氓貿易城市。積貲頗饒。稔知公不欺。囊金寄之而去。久無音耗。公訪之。其家死數月矣。問其妻子。曰。曾有寄托于人。否。荅曰。無之。公乃以實告。擔囊而還之。妻子驚疑未定。公已拂衣歸矣。其平生厚德。悉若此。子源。崇禎丁丑進士。

夏同知尚忠。號筠泉。以明經爲樂城令。留心撫字。額征令民。自投櫃。猾胥不敢上下其手。邑苦種馬之役。傾家者相望。公請于所司。均勞逸。酌僉派。以田多寡定則。民得息肩。歲饑。李撫軍以公實心愛民。檄就近

施粥全活甚衆擢湖州二守蠹清訟止士民安之解
組歸園林自適卒年八十有二孫時泰崇禎庚辰進
士

周封公文煒始祖匡宋進士世居于白下金沙井後
徙櫟下父應槐數夢家山火光熾然謂子孫當以文
顯因名諸子以文咸從火字公曰赤之公志行高邁
羣稱曰如山先生而公語人曰吾固坦然而也遂自
號坦然工制菘孤行已意困于有司遊南雍交天下

士見人有失必正色繩之人畏憚欲避去又委蛇開
導之好濟人急家計中落慨然欲稍有建明謁選暨
陽薄凡不便民者力爭于令由是與令忤公嘗夜出
聞女子泣甚哀鞭扑隨泣聲下詢之乃吳興人也北
里朱某以計詒其寡母購之渡江逼與蕩子夜合女
誓死不從日撻之公置朱于法白直指遣役吳興召
其母以女還之有婦妬妾榜掠備至加以炮烙立斃
令屬公往驗觀者如堵公慘不忍見痛懲悍婦擬以

非刑殺人論死人皆稱快。令受賄庭鞫。謂毆婢無死法。反扑妾父。觀者鬩然。擲礮堂上。曰。令不簿若。令益憾。公旣不得行其志。七遊五洩。往返踰時。令無以難公。左遷王府官。遂歸秦。淮曰。壯爲五洩遊人。老作秦淮釣叟。吾願足矣。閉門教兩子。盡發數世藏書。公之字內。凡中州豫章親友失業至者。皆週恤之。嘗貸祥符張氏數百金。張沒于水。垂三十年矣。公必致其子。養蒙于南。貸金償之。養蒙茫不知所以。人咸歎服。子亮工。庚辰進士。歷官戶部右侍郎。所至政聲甚著。被人言對簿。識者寃之。公曰。兒自愛。無死法。惟大書天字于四留堂。堂前產瑞蓮甚異。未幾果南還。再簡督糧。公見後進恣睢蕩無矩法時。鑄先輩格言訓之。著觀宅吉祥相暨陽紀畧五洩苧羅逸事詩數。四留堂詩集旅塵適倦諸集。

張彥先一儒山行詩。草樹亂雲中。芙蓉插天外。密坐酒酣香霧濕。疎牕人語月華生。花影云形消夜雨。晴

猶在怨入東風老不知。鴈字詩天際微茫猶見墨。風
吹歷亂不成文。申瑤泉極賞之。中丞奏賦天
童都督仲揆字元圃。孝陵衛籍。萬曆戊辰武進士。侗
儻有大畧。猿臂善射。有古名將風。任四川都司。熊經
畧聞其名。疏調軍前。屢立戰功。後與石柱土官秦邦
屏率師渡河。衆寡不敵。公揮短兵接戰。中弩死。朝野
共惜之。贈都督。廕其子以振。孝陵衛正千戶。以振歷
官陽電叅將。亦死于陣。

韓峰公之孫沈子胤。多識典故。嘗言景前溪乃中丞
清之後。蔣宗誼祖母乃文皇所賜女官。因同瞻恭靖
公像。夫人紗帽緋袍。仍官粧也。恭靖名武。字用文。善
詩文。工醫。有靜學齋集。文皇御札。敬問蔣院判。云

後用押凡數十通。公乏嗣。上賜配生四子。長主善。繼

其業。次主忠。主孝。錄句主善仁廟時尤被恩遇。賜莊

氏李氏宮女二人。解大紳三。楊蹇黃諸公皆有詩贊

其世美。景泰時十才子。則主孝主忠與湯胤勣王貞

慶皆金陵人也。相傳主忠芙蓉絕句。清露下林塘。波光淨如洗。中有弄珠人。盈盈隔秋水。

又言萬曆癸未科武狀元解元祖解道。像如童子。服袞龍袍。攷丹丘云。高皇與其祖有舊。憐其五子皆戰歿。命抱孫至。御書賜名解道。授指揮。髫年入朝。張真人與拱手。糾儀劾之。上詰所以。真人曰。臣不敢言。言則道死矣。上固問。乃曰。道乃天上黑煞神。故臣加禮。上卽宣道上殿。解大紅團領袞龍袍賜之。歸家未入

室死。荆樵鎮山西。著宦績。究心理學。孫學熊。戊辰魁。有閒居詩。脫來宦海風波客。拾得柴關花鳥身。

又言其始祖仲銘。卽沈萬三弟萬四。洪武初以富戶安置雲南。永樂間始放回。雪崖公琪。韓峰父也。工毛詩。長于篇什。事親盡孝。親歿。扁其樓曰瞻雲。掃墓示子侄云。昔時卍角依親後。今日霜髯在爾先。雲樹不殊千古色。箕裘又見百年傳。尤善鑑識。司馬西虹垂髫時。一見知爲竒才。以女女焉。詩集亦名瞻雲藁。

梁克訪字省愚與子津世業星曆悟射字法隔窻壁
一內一外隨人寫詩文與在外者一見或密語一事
卽拍掌數下在內者應聲云此某句某事周吉甫不
信自往試以新詩未示人者鶯啼催小飲雀步伴閒
行二句與之射一字不差乃服其妙寓燕京寄家書
止用一二三四五六七八九十此十字或疊之或倒
之凡寒溫秘事皆備唯其父子能識之旁人不解其
孫從予授經時津已歿省愚遂不談及亦絕技也

黃都督越號長白錦衣衛籍萬曆辛丑武科第一人
歷官南京左府都督僉事生平功績甚著在粵東渡
海征黎平抱由羅活諸峒在南水陸營渡江禦蓮妖
保護鳳陽在黔領專勅征安酋擊破酋定織金大方
諸寨捷聞優賚解印南還遂家金陵少孤事母孝事
伯兄如父祿入悉周宗族不爲家年七十八卒
張莊節公可大字觀甫幼警敏善騎射與先伯父嘯
雲公同舉辛丑武進士以左都督鎮山東勤王解都

城之圍。領專勅平島帥劉興治。又盪寇于鐵山。許太
史石門稱公將而能吏。勇有其廉。內陞左軍督府。已
得代。聞兵亂。回登州。爲戰守計。值登陷。死之。贈太子
少傅。賜祠額曰旌忠。賜謚公孝友博學。所至敬禮賢
士大夫。著真州婁江。電白舟山諸藁。白下牟子駛雪
齋諸集。寄陳眉公。芙蓉瀉綠濤。琳玕冠玄圃。言語妙
天下。珪組如塵土。遊補陀。驚嶺直從鰲柱駕。慈雲常
向蜃樓看。蓮花出海香。臺淨寶月當天。玉鏡寒。祇樹
飛濤山噴雪。沙痕映日地浮金。蓬萊閣。蔚蘭佳氣滿
巖關。羣玉峰頭擁翠鬟。拍岸浪花鳧出沒。捲空雲陣
鳥飛還。島中義士風霜古。洞裏仙人日月閒。員嶠方
壺何處是。只疑相隔小重山。平島還軍黃雲飛盡天
如洗。鰲背山前萬頃波。辛未端陽巡海著。北海遊紀。
曰九障巖。曰鏡石。曰唐隄。觀海市。曰西山口。曰黃成
島。曰黃金山。名海外六觀。文特秀拔。海市記曰。唐隄
在海中。兩山之間。從廟島望之。如鋪白練。相傳唐太

宗欲過此山。隔水不得渡。禱于神。一夜沙石湧出。成隄。至今洪水衝突不壞。故知鞭石驅山非虛語也。予于六月望日。駕舩至中流。長年報曰。海中有市。遙望鼉磯黃成島。疊起樓臺城郭之狀。浮屠雲樹之形色。頗淡黑如米家山水。亟移舟就岸。登山頂。東望海洋。紅光隱隱。直薄雲漢。華闕碧堂。金臺石室。紫府丹房。無所不有。而又紅垣環匝。如金谷園中。錦障千里。遠不知其所至。其中則人物往來。車騎如織。儼然都會。觀者無不洞心駭目。嘖嘖歎賞。嘗讀蘇長公貝闕珠宮神工幻影之句。每謂寓言。乃今信之。凡海皆有市。以予南海所見。列若翠屏。環如赤壁。中隱隱突麗譙狀。觀止此耳。求所謂金橋千尺。瑤闕萬里者。無有也。凡山亦有市。如誌載棲霞方山。春日晴明。四圍雲物布濩。現城池樓閣幢幡諸形。是亦市也。然不多見。故市必以海爲奇。而登海之市爲尤奇。市之始見。每于春夏東風微發時。冬則無之。此子瞻以歲晚至登。

苦不得見。禱而有應者也。特其起伏變幻不可名似。倏而成市。倏而歸市。倏而罷市。孰能窺其所以然。窮其所不必然。莊生所云宜問諸罔象。問諸鴻蒙者也。憶予已巳春在太平樓。見市起小竹。已而連大竹。牽牛諸島爲一。有樓船數十艘。懸帆而來。爲城闈者三。門俱半啟。爲塾臺者二。上懸赤幟。山麓吐一平堤。上有人物俱服紅紫。因據綺寮稱絕。不如此番所見。更爲靈恠也。卽土人亦云數十年來所未有。噫異矣。子鹿徵。幼擅文譽。以廕授錦衣衛鎮撫。掛冠隱雨花之松風閣。

蘭若曉鐘鄉夢斷。布帆春漲客程遲。月明湘岸聞猿嘯。花落黃陵共鳥悲。

陳布衣佺胤

廖傳生孔說。博學強記。輕儻自喜。漉囊策蹇。日遊谿山間。海昌許同生棄官隱華陽。招之偕隱。常棲止祈澤龍泉之勝。晚年持律。修淨土以終老。後人或見之茅山柏枝左右。相傳以爲尸解云。匡廬詩。溪淨飲猿

連臂下松深。巢鶴掠衣飛。一夜雷聲在山下。始知身出萬重雲。

紀竺遠青題松風閣。幽棲寺裏松風閣。明月懷人炤古苔。記得當年深夜話。雨聲欲盡鴈聲來。

傳遠度汝舟。寄濬上人。英雄回首只歸僧。次第徵心到幾層。燒死殺人三昧火。拋殘救世十方燈。弘治時丁戌山人亦名傳。汝舟侯官人也。遊鄭繼之門。好神仙。棕鞋箬笠。徧訪名山。王道思序之曰。汝舟才智足以仕進。獨舍去不好。其舍之盡。至于鄉井屋廬不復可居。而妻子不足畜也。詩句雖貧一榻能高臥。縱老名山亦遠尋。異書自得作者意。長劍不借時人看。前後二傳姓名同。情性才調亦同。

韓君孺國楨。遊府庠。性豪宕。偶見府役拘繫夫婦二人。甚有苦狀。問之則負債無償。將鬻所生女以交官者也。公惻然。問所鬻幾何。荅曰二十金。尚未定議。公囑府役寬之。解囊如數代償。以完聚其骨肉。夫婦感

甚問其姓名公弗告欲以女歸之又固辭鄉鄰稱高
誼焉子范舉崇禎丙子鄉薦

李虛雲克愛如真之孫天性誠篤以孝友著名時彥
多從之授經與弟虛舟皆有夫子之稱春郊云消息
誰教春不斷杏園猶見有梅枝卜居長千里之西與
李義人張興公講學賦詩號南郊三老

義人名尚志一字何事素負經濟才兵農典禮以及
奇門遁甲之秘無不深究意不可一世然韜光不露
冷然沉雄奇士也夜歸詩敲門誤中寒松影驚起枝
間宿鳥飛

興公名基宿學清才器識過人自幼多見前輩名公
萬頃在目波瀾獨老尤勤于性命之旨以餘技爲舉
子業都人士多取法焉詩句古路如冰雪誰從下脚
來佛聲黃葉下人事白雲間緩步入山去回頭看水
時咏梅花日月深山如見曆乾坤無汝不回春哭穆
如山中風雨知何代死後文章見古人子惣能繼父

志次子童求。幼卽出塵叅學。

馬文先上圖。少孤而貧。孑然自異。讀書獨求聖賢要旨。謂文菀末也。物身以礪。行爲先立。品以安貧爲驗。養孀母。撫諸弟侄。資筆硯以盡其歡。耻干人。夙通淨業。非道不交。客至不蔽風雨。僅龙蓆爲斗室。龕燈却掃。高朋匡坐。蕭然野僧也。余大中丞獨喜其踴涼。延以教子。諸子貴介。侈聰辯。公收以夏楚。不少徇。大中丞益敬禮之。執友之妹。貌陋而跛。年及四十。媒妁不一。顧公獨娶之。爲母尸。養高衲崧雲古航。清修梵行。不輕接見。獨與公往還無間。鄉黨自好者。聞文先風。濯濯爭自愛。一時士習相觀而善焉。歿後。人益思之。予四十年前。見都人士。尚有古風。高者志于道。中才以下。亦閉門讀書。不預外事。大槩廉隅整飭。不以阨窮喪所守。雖閒談跬步。亦有忌憚識羞耻。如范茗水。植吳卿文旦華之嗜學。黃少龍應登楊沂水各世之淹博。何開遠如充之修潔。徐時若沛之溫克。鞠我猶

士龍之篤實。鄧干霄良材之不苟。黃聖因日乾之沉
摯。施元引化遠之疏越。謝願小廷相之冲謹。周仍叔
景濂之秀雅。其人若在。皆有一絲繫屬人意處。

姚守禦先疇。字庚先。京衛籍。崇禎八年任浦口守禦。
流賊破歷陽。圍江浦。公從遊擊汪之斌援浦。乘障用
火攻。五戰皆捷。斬賊無算。城賴以完。之斌貪功議搜
山。力諫不聽。果中賊伏。公率所部救出重圍。之斌以
偏師潰走。賊麋至。援絕矢窮。誘降不屈。以刃脇之。罵

賊死。兵部尚書吳橋范公厚卹其家。先是戊午三
路之師。紅旗促戰。南營帥姚國輔以遊擊將軍領銳
卒三千赴援。血戰死之。登州之變。鎮標千總姚士良
請當一隊。與遊擊陳良謨中軍管維城同陷陣而死。
三姚素以膽勇聞。故皆能爲死封疆之臣。

潘總鎮可大。江寧人。起將才。嘗建功齊魯。北援京師。
南援閩粵。皆有功。崇禎庚午授安慶遊戎。遇流寇入
桐潛。公訓練爲備。約同史兵道四面堵截。屢有斬獲。

丁丑復邀擊賊于鄧家店。賊騎數萬。公領三千餘人。久戰月餘。糧矢俱盡。度不得生。乃取關防印襟袂十數處。以身殉焉。史公招魂而哭。蘇撫張公國維臨皖祭奠。紳民悲號立祠祀之。事聞贈廕。

汪文毅公偉。字叔度。崇禎戊辰進士。授慈谿令。多異政。邑有虎災。無能獲者。公宿廟禱神。次日卽獲之。剖其腹有五小虎。自此山行免患。戊寅擢簡討。目擊多瘡。荆襄失守。知時事不可爲。欲保全陵以固根本。乃

上江防綢繆疏。一曰布置。謂禦淮所以防江。守九江所以守金陵。宜簡重臣駐武昌。建督撫于九江。并分設兵部侍郎。建牙太平。采石浦口以備叵測。二曰用人。謂守江責督撫。守城責京兆。特薦臺諫詹兆恒。葉樹聲。舊撫袁繼咸。方孔昭等以任封疆。三曰設處。謂兵非舊額。兵虧而餉不減。水戰恃船。船壞而費難稽。當清查額設錢糧。以土著衛所之官舍餘丁。擇壯勇者補伍。整練兵船以助聲援。或有不足。鹽課漕艘可

以暫借江南廣浙料解權改折色。凡條奏千餘言。上嘉之。迨甲申二月流賊內訌。真定總督為叛兵縛送賊營。公聞泣曰。事至此乎。作書寄陸給諫。朗曰。闖賊襲真定。奸細滿都城。外解無絲粟至者。諸臣無一人可以支危亡。如聖主何。惟憤恨平時誤國之人。終日鍼着膏肓然已無及但存醫案耳言門戶而不顧朝廷之門戶。終日言聲氣而不顧窮民之聲氣。今日尚何處伸其狂喙耶。昨朝議又欲移史撫臺。其正色曰。諸公并江南亦不要耶。時以為名

言。三月中賊圍城危急。公顧耿孺人善撫幼子。耿泣曰。君不以雍氏待我乎。公瞿然曰。若此能成吾志矣。十九日昧爽。耿使弟元吉同僕抱幼子晉匿去。公入朝。但見宮嬪紛泣。三繞禁門不得入。歸過吳公。其來約全死。返寓嚙指謂耿曰。當為厲鬼擊賊耳。城破。耿檢新相衣。上下固縫。引刀自剄未死。復投繯。時年二十有三公捉筆大書于壁云。崇禎十七年三月十九日城陷。翰林檢討汪偉同繼室耿氏死節。遺書長子觀。囑以

養老母。掃先壟。以吾夫婦衣冠。招魂塋之華山。俾常依吾父母也。遂自經。有僕突入見之。號慟解公下氣。絕良久。復甦。問誰解者。僕泣告。公大怒。憤罵逐僕出。再就縊。遂致命焉。觀壬午鄉薦。能繼家聲。在南叩闈。贈公少詹。建祠。賜祭。塋及謚。

徐主事有聲。字聞復。多才伉爽。崇禎辛巳。廷試上奇。其對擢戶部貴州司主事。居官廉勤。釐剔宿弊。朝退每對予。有反裘負薪之嘆。適司成以新舊餉數問策。公出袖中掌記相視。太息曰。額征至二千三百二十八萬五千二百有奇。漕白糧四百二十餘萬。尚不計焉。乃新餉額出尚少三十三萬。舊餉額出尚少八十五萬。又增練餉補之。猶不足。安有取民至此。極而能立國者乎。語未畢。泣下。闖戈指闕。公死難。

梁羅田志仁。號霏玉。保定侯銘九世孫。遊府庠。登萬曆戊午鄉薦。壬申授衡陽令。時流賊橫掠。蘄黃中樞以公才。調知羅田。公築城濬隍。晝夜戒嚴。賊帥有飛

天王曹操者知公清正令諸營勿犯界會邑豪汪猶
龍通賊公捕繫之獄龍知不免遣家奴潛引賊入公
大罵裂縛奪賊刀殺數人賊怒遂刃公于倪公祠妻
唐氏不屈死操賊方屯吳山聞之馳至羅田斬手刃
公者以錦綺歛公夫婦屍大書署版曰梁公并夫人
柩羅人哭之如喪考妣祠祀焉事聞贈公蘄州知州
陳南寧六奇字鳴驚號曦升龍江衛人事親盡孝礪
志工苦萬曆戊午鄉試房考虞節推延陛閱其文許
以細心可任天下事獲雋屢困南宮以親老謁選景
陵令飲冰而治兼多惠政或以家貧諷之公寄子曰
輝等曰陶令歸來無酒價范雲在任乏身謀肯將百
代流芳骨漫作千秋貽笑儔其介節素矢矣又嘗語
予曰縣治鄉陌嶢嶢曾以公事夜歸民家無男子者
婦人必于門內束葦爲炬以照輿從過爾時惻然念
何以荅百姓仰望之情欲不盡心民事得乎服闋補
任曲靖府南寧縣獻賊破城知府焦潤生死之公被

殺于東門。一家皆遇害。

胥光祿自修字二如。江寧人。萬曆壬子鄉薦。授曲陽令。豈弟廉能。勤卹民隱。中山之政。爲三輔最。丁艱起。復補宜黃。值奸民劫掠。多方捕獲。欲寘之法。有夤緣。縱以出柙者。坐是與當事忤。拂衣歸。曰。吾爲民興利。除害他何卹焉。百姓攀轅。至今尸祝。家居餽粥不繼。惟以詩書自娛。久之。左遷衢州府檢校。轉光祿監事。尚未離衢。值國變。具冠服。北面肅拜。自是絕粒。子弟

勸之不顧。曰。吾惟一死報朝廷而已。八月三日城陷。猶端坐不移。爲衆兵所殺。家人倉卒卽于座處掘土埋之。月餘事定。乃收斂。時天氣猶熱。啟視面目如生。衆皆驚歎。年六十有五。生七子。長庭治。字肇平。爲諸生。有聲。娶任氏。生二子一女。先因避居桑園浦。聞訃。同妻赴水死。其子時逢。時迎。及幼女。見父母死。則皆溺死。五尸互結。不可解。鄉人合爲一大塚。瘞之。遠近聞者無不傷悼。

王學憲芝瑞字鍾淑二十中戊午亞魁登崇禎辛未
進士授行人天性豪軼尚義輕財濟人之急庚辛間
道殣相望公于梓誼在都門者病給醫藥死爲歛送
無虛日皆稱貸以應之由禮部主事陞四川提學衡
文造士著卓異聲未幾國變公遠跡粵西之端州以
卒梅庵僧雪憨藁葬庵側人無知者子馮自金陵肩
囊走荆楚閩蜀躡躡萬里扶櫬并載公同官潘澹予
之柩與俱歸馮字杲青有文名工詩早卒人多惜之
贈友古道投交重閒居閉戶尊江上放舟潮澗春歸
柳覓路村紅酒漉巾

黃知州居中字明立其先閩人官金陵樂秦淮風景
因家焉幼穎異十歲能文萬曆乙酉舉禮記魁謁選
上海諭教士同于子弟陞監丞與六館生講究不倦
轉黃平知州投檄歸老清溪之上購書數萬卷一燈
達旦名卿大夫如李本寧焦澹園皆推重焉性介不
苟族人爲南大司馬有營弁以千金請托者公曰奈

何以此失吾生平。麾之不顧。年八十有三。聞甲申之變。號慟累月。卒。所著有千頃齋集。文廟禮樂志。明文徵論世錄。

孫別駕自修。字無修。母夢日光入懷而孕。中天啟甲子。舉人。豪華自喜。放跡不羈。謁選令。鼉江。遷雲中郡司馬。請告歸。感時亂。遣其愛妾三人。仰天大笑。隻履出門。禮頌。愚報恩二和尚。祝髮爲僧。巖棲谷汲。嘗擔柴負重。以自給人。無知者。但目爲苦行頭陀。甲午寓

禹杭之懸溪示寂

劉尚寶旋。字通生。孝友篤學。古道自期。崇禎戊辰。恩貢。謁選四川崇寧縣。有惠政。丁丑。獻賊從廣元寇蜀。州縣望風先避。彈丸無援。公獨誓守。查盤倉庫。擇殷實紳衿子姓。散寄取領。獄囚取保。以備不虞。賊攻圍甚急。父老曰。崇邑無城無兵。君侯不去。何待。公笑謝之。賊蜂擁而至。公冠服獨坐堂上。罵賊。賊怒。剗其目。抉其腎。罵聲猶未絕。事平。倉庫俱全。衆囚投獄。子綿

曾護印候代巡撫傅宗龍直指梁士濟疏聞上嘉孤
忠贈承直郎尚寶司丞祠名宦鄉賢給其子衣巾奉
祀。

翟去文翬幼負雋才父時舉仕至叅戎極鍾愛之中
軍督府徐公心鶴重其所學以孫女適焉痛闖禍棄
妻子入山坎塲以死。

張文峙字紫淀莊節公弟七歲能讀楚辭弱冠雄據
詞壇貫穿經史辨覈掌故務爲根抵有用之學是時

宇內奇才劍客多集舊京公班荆抵掌皆畏伏去流
寇震驚鳳泗范大司馬詢江防策公臚陳古今方畧
撰南樞志一百七十卷圖阨塞核兵餉稽營陣布置
南北數千里列如指掌莊節殉難徒步逆其喪中年
坎軻貧甚倍篤友誼虞山太史爲之傳曰文峙慨有
大志孤行側出歌石爛而憂天墜非皆人所知也傳
曰士尚志文峙以之家鍾山之陽圖書滿架聞薊地
之令擲筆徑出墊巾壞服往來棲霞雨花間出無童

入無廬。冬無裘。夏無葛。衰不秋。病不藥。行忘之。遊忘
返。行吟野。哭嘻嘻。咄咄。癸巳冬。積雪拒門。擁衣寒餓。
咏雪。滿山中之句。賦詩四章。歲暮懷友十六章。踰年
屬疾。告其弟二嚴曰。晚年讀楞嚴般若。悟成住壞空
之理。病中有神告我。是身清淨。勿以感懷錯亂。任運
往耳。所謂強立不返。得正而斃者也。傳曰。士守道。文
峙以之。咏感。匠手鑄金。防躍冶。客心改火。避寒炊。干
觴醉月。尋盟易。一杖麾雲。遯跡奇。憶舊門掩寒雲濕。
數重深嵐。一徑掃花封。草堂終古通仙譯。蓮漏何心
荅暮鍾。嬰武夢殘人得句。芙蓉香冷月當胸。半編黃
鶴騎雲讀。卜宅依然七十峯。梅花三盞瑤華初拭垢。
五銖裾影每憑虛。鸞遊碧落簫晨舉。鴈叫瀟湘瑟夜
鳴。出世蛾眉惟澹澹。真人胎息已深深。毫端日月齊
枝影。塵尾山河遂隱心。此君入夢多逢雨。惟子無心
可學雲。纖月掛簾方下拜。踈香隨地未成痕。玉筐烟
霧初侵髻。青鳥黃昏欲叩門。雪知閉戶花間臥。鶴獨

經行路不窮。閒坐月墜玉壺。因避客。花園石榻守棲。
真井丹高潔。人難學。曼倩談諧。道所嗔。花藏大壑。春
常住。鶴到名山。累亦輕懷人。天下才人失魂魄。一言
待君生羽翼。野老特立如孤松。拏雲扶石天之外。晏
坐深山四十年。穴旁猛虎忘機械。山行花冷舊牀侵。
佛座。月澄濁酒影疎庭。琴。淒鸚鵡三更雪。盞。滌芙蓉
萬朶青。禹廟述夢。玄黃蘸汁。帚麾徐。曾掌垂芒八角
書。灑氣隨空穗黍米。天地大文非蟲魚。星光中劃青
蒼裂。結繩左紐誰權輿。岫。嶺一碑曠劫護。玉柱。拗天
珠。覆旒。蜿蜒掛簷屋。漏拖波磔。彎環風雨疾。忽然隨
風翻譯難。蒼水使者威靈帙。桃花春漲龍起梭。鐵鑊
支祁浪驚溢。始變猶如蚪蚪文。頃之奇幻殊難詰。端
詳盤結生角尾。條條取次纓斐亶。迴紋縐縠黑鴉翻。
千壑巉岩勢瓌瑋。鐵花秀掌吐殷紅。驅遣猙獰走神
鬼。著紫淀老人編年藁。五十卷。選宋元詩十卷。明布
衣詩百卷。手錄古文稗書百餘卷。沒後皆失散。猶子

瑤星作遺書嘆以傷之。書百篇。瑤星作遺書嘆以傷之。孫石字介臣。宿學有盛名。砥礪廉隅。言笑不苟。時人擬之。百尺孤松。晚年更減緣息慮。以求性學之旨。重其養者。謂及見先民典型云。咏苦瓜。世情皆取悅。爾意獨何殊。和唐宜之。落落往來無一物。勞勞桑海有多層。蕭條瓶鉢閒拋盡。大地山河一野僧。陳學諭元慶。字允嘉。六歲失怙。母李氏勤女工以教。育之。公性孝。母邁危疾者。再以身鰓代。授徒奉甘旨。唯謹。嘗游海門澹園。兩先生之門。與聞性命宗旨。舉萬曆乙卯。亞魁。丁巳喪偶。遂不娶。念母老無以爲養。乙丑就湘陰教諭。改滁陽。滁科目久落。教法廢弛。乃力爲提撕。士知自奮。至丙子始有雋者。在滁日。適余集生先生被逮過之。莫敢通問者。公奔赴慰藉。遠送焉。是冬賫捧抵京。再入請室。凡三宿其中。時朝貴繫獄者。咸謂急難見石交也。癸酉轉上高令。公曰。古不以三公易一日之養。母年八十。獨子依親。非王制乎。

乃陳情不就。聞者以爲真孝。廉云：草築雞鳴之麓，齋素持戒，進母以淨土之業，相依爲命者四年而母卒。益虔修淨業，以伸終天之感。嘗有荅友詩云：梵筴藏身當墓廬，其至性然也。生平端介自持，京兆尹雅慕之，無由識其面，倡惜字紙之議，自此無敢棄于路者。耽佳山水，每窮巔際，控奇握險，瀟然寄傲。賦詩見意，云：自分退步便無求，到得無求可自由。又云：閒聽兒童咏鳩拙，家園便是兩根柴。

子大韻字二友別號

寶箏早慧多才，每試必冠。多士戊寅秋祝先人雙壽，卽席百韻，四坐咸歎其敏。江山之南軒轅裔，其中壽者忘年歲，又有玉樹名玕琪，聖木食之生奇慧。歲星今已來人間，青鳥作馭何翩翩。看取梅英點飛雪，爲君一醉雙親筵。想有蘅薇斗中授，致令太乙常照劉。才德並儷偕壽難，古稱樊君與劉綱。先生磊落志用世，中乃逃禪事佛偈。焚香晏坐若深山，樂易近人全豈弟。翁旣好道耽禪喜，君復無生契深理。瓶鉢依稀

是寶幢。以無量壽爲親擬。憶昨宮諭來江南。奇士一
夢誰所堪。功名沈湛優器識。如濯明月于深潭。君家
翮羽集雙鳳。繇來二劉稱伯仲。屏山家世固不輕。自
是歉寒資者衆。瓊膏餐之青芝茹。我儀酌獻九霞卮。
絳縣甲子何多爲。葉宮玉杵生沆瀣。雲封鐵杖來希
夷。珠聯薦就干軸詩。已卯冬作北征賦。送子祖餞方
列。驪歌成誦。行行去帝京。先着鞭兮歌祖生。賢良方
正罕厥儂。宏詞博學兼其名。天子右文拔奇雋。騷壇

獨立開雄陣。太史執奏位殊科。遭時亦類春王閏。

庚辰

閏正月時困副車故云

我所愧僅一經。君獨沉涵六籍窮。滄溟

我所愧未能文。君獨揮灑萬言成。風雲咄嗟寫就廿
三菘。棘闈鼓角聲殷殷。頻扣松牕問所學。云尋常耳
何足論。請以律令爲子說。每于讀書倦。拂紙颺輕塵。
尺尺寸寸眊日影。脫藁十數皆逡巡。我無玉尺度君
才。君前五經得意走奇筆。度費風簷二丈三尺日。此
日照人慘澹費經營。誰似君家璀璨錦繡遲。芳陰忠

孝理一致。愛日留丹忱。訂交越惟戊辰歲。迄茲十有

三年春。與君先後集璧水。謬附時譽。曰劉陳。帝鄉我

未從之遊。昨年闡牘空相收。評有惜以額溢見遺之語殷勤既別

重朋友。授餐舉檄猶多周。為鞠岩長郵其後是夕傳啟同社泰山之

雲徧天下。霖雨蒼生為君謝。西阿御翰朝爽披。金門

奏策君方暇。歸來重贈紀遊編。彷彿共君名山大川

相周旋。二友沒後遺書盡失此乃卜生公存藁讀之倍慟人琴

唐長史時宜之。其先浙人。卜居石城。資稟高潔。飄舉

世味之外。自楚藩長史棄官歸。臨潭築室。每于風清

月皎。魚龍夜嘯。梵唄相答。翛然自得也。終其身無疾

言遽色。興至則行書數幅。高吟遠眺。嘗作蓮花世界

書以寄懷。堯市溪頭。纜古舟。收綸罷釣。碧雲流。孤猿

學定前山夕。白藕花開峰頂秋。寒涕不收衣。下事眉

毛。擗結一匡牀。三更掣斷煙霞鎖。翠萼芙蓉噴古香。

黃虞言稱其清狂絕人。孤高無偶。然處世疎寒而不

傷于刻。怒馬巽父曰宜之有用之才也。二公深知

宜之者。敬與之游。則又竿頭更進。全歸平淡時矣。病鶴哀猿。雲崖獨嘯。意有所專嚮耳。天靳其後。鈴繼徒悔。莽蜂淨居。化爲屠肆。每過其廬。輒欲挽潭水一洗之。更增慨者。其右則何太僕龍德講院。左則丁明府鷗園。對水相望。則余中丞放生書院。露臺層閣。移花倒影。蓮舫如瓣。魚泳不驚。洵城西一勝地也。今不但數易居。停且鞠爲茂草矣。盛美不常。奚怪焉。

凌戶部世韶。字官球。爲諸生。卽以詩文鳴。登崇禎甲戌進士。授福清知縣。不事催科。上官屢徵賦。不應。曰。朝廷令吾牧民耳。鞭扑非吾事也。左遷汀州。經歷署寧化縣。縣境邊海。民操土音。不可解。凡以納課至者。胥執爲盜。而奪其有。民莫能辨。公知其弊。痛懲之。民乃得安。公庭積逋。爲之一清。遷處州理刑。擢戶部。以忤時去位。甲申棄家。爲頭陀。居半峯庵。寂莫自廢。但手評晞髮集。深心懸解。見者有郭象註莊之譽。及卒。巾鉢蕭然。幾不能斂。陳侍御旻昭爲之誄。曰。食無田。

居無椽。置身曠劫之前。而愍視大千。故雖貧不憐氣。孤愈騫。白虹紫烟。河漢帶天。世則替。惟古之嗜。奧乃肆肆。乃中于義。當其棄官以逃。寔求其曹。古今利海。秋風鴻毛。僉曰。此亦晉淵明也。請私謚以文陶官球。題金山。吳楚奔騰。孤砥柱。古今睥睨。一吟壇。江中放意。綠雲遠。天半長。誰紫筍寒。應守羣龍睛。吐玉更橫。雙鶴夜聞笙。烟寒澤國。一聲磬。月色天涯。數點鴻。感懷。秋水在河伯。名山泣史遷。

艾子魏容。幼負經世之略。豪于詩文。悲時嫉俗。每慷慨淋漓。不能自已。壬申。客劉總戎幕中。力爭機務。于督撫不從。知其必敗。夜潰圍。衣鐵甲。渡水。水深沒馬。腹行數十里。遲明登州。已陷。遂自保定涉淄濰。還次濟。登太山。俯日觀。復遊薊門。歷盤山。目擊時事。日非圖消弭。撫治之策。長鳴永號。不得行其志。鬱鬱以死。識者稱其強忍有力。達觀遠見。燿然中當世。受病之源。每與當事論時務。皆出血誠。未易才也。送千子詩。

衰文以身起。同響勵高節。遊蜀梅花官閣遲。鐘下霽雪眉山一笛通。著微塵閣稿行世。

少冶公之孫王萬禩。字日華。嘗述少冶守台州時。與戚南塘禦倭。躬親十數戰。全活所俘男婦數千人。台人爲立生祠。頌德焉。日華孝友嗜學。母武氏病危。剖股以進。病愈。登上壽。先賢李如真朱顧二太史皆重之。著金陵名勝錄。名山雜紀。河海錄。彙陶全編。奕林。與弟月華並稱博覽。

常延齡字喬若。開平十四世孫也。伉爽有志。襲封遇事敢言。前後條陳疏凡十二上。皆切時弊。上深眷之。嘗清巨璫。王民籍產。上命查給。蓋異數也。時科臣姜垓。熊應霖。以劾首輔下獄。公疏請釋二臣。而以文彥博救唐介爲輔。臣勸朝論。避之。馬阮擅政。公復露章糾劾。忤權臣意。卽掛冠爲僧。號蒼谷。居村菴中。傍無儼從。灌園自給。饑寒晏如。死無以歛。友人白生胡生等醵金。葬之。夫人徐氏。六岳愛女也。食貧如飴。躬操

井曰辟纊而食荆布不充。至死無怨尤。

王穆如亦臨。崇禎己卯舉人。讀留侯傳云。忠孝出世間。楚漢非心胸。謀成容偃蹇。白日笑封侯。杜門謝天子。赤松亦微棕。當日功臣輩。視之如飛龍。壽黃翼龍八十笑。謝筍輿能緩步。每耽坐隱耻。書空置身已在古人上。行世還同秋水中。山居詩。秋陰掩牕臥。小雨爲四隣。午巒閒曝藥。疎柳靜垂巾。人吹玉笛天能老。春到梅花氣不平。夕陽歸鴈初嘗酒。明月清歌半出樓。

樓。

陳侍御丹衷字旻昭。爲人豪爽。機警事親孝。交游廣。長齋繡佛山寺爲家。詩文古崛。刻琢自成一家言。咏梅十日寂寥。纔有性。四更縹緲欲無花。殘陰入谷俱生曉。獨月到庭如有聲。有美此生寒到骨。相思昨夜欲成痕。天地谿山寒日靜。別離風雪美人遲。可更凋零來對子。但論姿韻渺愁予。太古以先難問種。野人前面忽生光。暮天欲下短烟出。落月更來寒鳥鳴。秋

相詩。劔氣立寒。雨鴻心多。夕陽千古。文章存恐懼。百年饑渴。卽輕安。

賈戶部必選。字徙南。萬曆己酉鄉薦。歷官戶部雲南司郎中。居官有特操。動以古義自律。不假詞色于人。時宰誣同官倪樸菴。以屯豆下獄。公憤憤不平。揮涕與家人訣。力率六倉郎盤查豆數。無虧。毅然具揭。移咨鄭大司寇。題疏申救之。并逮大司寇。公暨承問官俱謫。遂杜門著書。老而目盲。捐資贍儒生數人。誦說古今疑義。公虎几聽之。爲一一拊折焉。隨給筆札錄之。成帙。所稱髦期好學。至死不倦者。卒年八十有七。著有四書五經解。藏于家。

顧與治。夢游英玉曾孫也。善行楷工詩。有文集行世。焦山紀遊。海色萬里至。江聲下何誼。籬花與客笑。老僧澹無言。響山圖此山。久擅名。空響猶未墜。溪水日夜流。千峯一門閉。山房世事到山盡。高言對佛無待月。先白水邊路。微分竹外鄰。

于友生徵咏梅數聲相送唯清磬一縷還來有白雲
烟水易尋樵不得林泉深入夢難羣靈谷孤杖身從
水澗入雙趺夢繞雪山來。

倪給事嘉慶字樸庵天啟壬戌進士母余恭人禱茅
山而生公幼卽篤志砥行脩然有出世思官戶曹時
議裁驛站公執奏驛站乃朝廷之一大養濟院也游
手強悍之徒不肯爲兵不卽爲盜者皆賴以存活今
過裁之若輩消歸何處是腹心之患也不從未幾闖

禍亂將發每無遠慮

獻之禍果熾繼忤執政誣以豆案寃獄七年惟掩關
危坐精研易理寃心釋典感曇花現影竟夕不散長
子震顛寃不白乃血疏詛神公誠之曰君恩置我爐
鞴煅煉凡根得休歇地凡下石者皆我善知識若以
寃家視之則誤矣壬午獲釋猶擬遣戍臺省交章薦
部遂巡未復隨羅國變甲申春拜銓部改戶科給事
中晉階朝議大夫未幾薙髮爲僧從顛愚和尚受具
戒得法于天界杖人稱笑峯和尚庚子夏沐浴跏趺

而逝。所著計樞銓諫棘遯諸草。棲霞青原諸錄行世。送可上人塞壑填溝原我事。拖泥入木爲誰辛。不經死後難言活。纔到疎時會益親。六朝松燒尾蒼龍猶攫霧。停機老鶴漫遶材。梅花白駒皎皎人如玉。振鷺翩翩客在誰。誰知澗絕山深處。月落前溪尚整容。

昔賢旣逝遺蹟日湮。雖子孫不能悉其高曾。亦可嘆也。爰自洪永迄崇禎之末。列所聞于右。卿相大夫以科名序。高士以出世先後序。三百年如電拂。聊存一方文獻之畧耳。運遭晚季。邦國殄瘁。人亦云亡。自長源先生後。各以死之先後序。笑公逃禪。收以玉振矣。



跋後

右島詢錄二卷分題曰存徵上下署碧幢隱
劉思敬輯按金陵通傳第五十二路閩傳附
載劉思敬字純一號覺岸上元人順治三年
舉人四年進士歷官刑部郎中廣西右江道
叅議母老乞歸聘修江南通志著有徽臚
編其存徵錄四卷載明都士大夫言行甚備
助蒐討者同縣沈維錫字生予明末官知縣
能知故家世裔云：又曲阜顏氏家藏尺牘
其姓氏考載劉思敬字純之江蘇上元人十歲

能文有徵賸，一為其尺牘，但載一首，中有云：舊日
筆墨所記，偶相知者，刊一種，奉公暇，寓目云云。又
江寧府志，藝文志載劉思敬徵賸，一編，又同
^治上江兩縣志，藝文志中載劉思敬存徵錄四卷，
徵賸四卷，又是書周樛園序云：金陵劉純之先
生成一編，曰南詢錄，蓋一方人物之紀，二百餘
年之寶錄也。頃全增修，郡乘得是書，為職志
稍加參佐，遂成全。又云：使由人物而及山水，
建制官闕，寺廟諸紀，載共成一書，足盡金陵之
盛云云。余既取是書，卒讀之，並蒐集各家所紀

如上以為劉氏之作，曰徵賸，曰存徵錄，曰南
詢錄，其實皆一書也。皆一未完之書也。乃為之斷曰
所謂徵賸者，即徵賸之誤也。所謂一編者，即徵存
錄四卷，徵四卷，^賸數也。應以縣志所載為確耳。是刻又
名南詢錄者，以樛園方為地方長官，故作者更題此
名上之，而仍於書旁注曰：送存徵上下，送其朔也。其
致顏氏書謂：舊日筆墨所記，偶相知者，刊一種云云。
應即指周氏捐貲刊此編事也。大致此書原未斷
手，其成者，特人文一編，中載樛園先人事，推美甚
至。故樛園先取而刊，^之觀周序云：由人物而山水建制

云、可見矣。徵賸與徹賸訛誤甚易。徹賸之書即
里中先輩亦未得見。其始誤蓋自江南通志輾轉相
傳而已。今得此書乃恍然耳。是書所紀於有明二百餘
年金陵人物大畧備具。而於諸先輩之零篇斷句及
司馬魯瞻家之藏書目錄尤不憚撮錄。足為文獻
之寶。信可寶貴。通傳又云路青岩作明代帝里人文
畧蓋取周暉之金陵瑣事。顧起元之客座贊語。劉
思敬之存徵錄。合為一書。余前年回金陵於仇道
庵家得見。人文畧深以不得能再得為憾。頃在舊
京江安傳沅井知余方蒐輯金陵文獻。出此見示。
殆孤本矣。亟請沅孫代覓寫手錄一通。藏之。將
俟他日更刻以廣其傳。明代金陵人獻實搃於
周頌劉三書。路氏采之以成人文畧。吾師陳伯雨先
生采路書以成金陵通傳。其溯源蓋如此。故余嘗謂
金陵典章人物非有明一代獨盛於列朝也。然而璘
璘彬特若不勝書者。豈非藉此數先生網羅廣陸
故後來作者易為資耶。一邦先盛之業蓋係於是。
非細事也。乃信先輩之雪鈔露纂非漫然矣。

壬申孟冬里後學夏承虎敬撰



Large stylized watermark characters, likely '上海' (Shanghai), printed across the center of the page.

Small square seal impression in seal script (Zhuanshu), located in the lower right corner of the page.

程